

# El Apocalipsis o revelación a San Juan

## *La revelación de Jesucristo*

<sup>1</sup> Chihtá uch Jesucristoat ehcujacro. Sirat chihtá uch ima chiwa quin acsar ehcún acu Jesucristo quin wíjacro. Awan semar chajarehquit bitara rehcátatara ima chiwa quin récaji ehcún ac wíjacro. Etya ehcún sehwar ima cacmá cuacúr bin as Juan quin áyjacro. <sup>2</sup> Etya ayat, as Juanat Sir chihtá acsar ehcuro. Jesucristoat as quin ehcú áyjaquey aját ac sar ehcuro. Ajmarát rahjaquey ajmarát itchaquey ehcuro. <sup>3</sup> Etya cuácayat, bíyatan Sir chihtá uch tacáyatan, bíyinatan uch taquic ráhcyatan, bíyinatan uch chihtá cágayatan, éyinan ohbac rehcáyqueyra. Caban ríyan to rehti bahnác caba rehcáyqueyra. Etya cuar ey chihtá cáquinan ohbac rehcáyqueyra.

## *Juan escribe a las siete iglesias*

<sup>4</sup> As Juanat ba acu ayin acu carit uch cuihsuro. Ba Jesucristo chiwa Asia cajc cut pueblo cucuí cuitar itquin acu ayin carit uch cuihsuro. Aját ba cuitar Sir ojcor conro. Ba obir yajcayta acu ba ohbac ítayta acu conro. Sira récaram binro. Ah cat im éytaro. Bur cut suw cut cat im etya réhquibro. Sir Ajcan Cámuran Eyat ba ohbac ítayta acu conro. Eyat ima cacum cara cuisa cucuí bin cuitar ba ohbac chácayta acu conro. Eyan Sir banco acat réhquibro. <sup>5</sup> Jesucristoat cat ba ohbac chácayta acu conro. Jesucristo Sirat yajquey chihtá

tehmoti ehcúquibro. Sácajaquin tac icar bin récaji yehnjáquinro. Cajc uch cut bin carin acu caran cuít binro. Jesucristoat is sehnacro. Sehnác rehquít ima ab bir guitar, ima chinír guitar, isat tayar yajác sicor tayar bár chájacro. <sup>6</sup> Tayar bár chajac etar isan ima jor uw ayin chájacro. Cahujín guitar Sir quin Tet quin conín acu is yinín chájacro. Uwat Jesucristo tamoan bur cut suw cut ay síhwataro. Ey chihtá bur cut suw cut yajcátaro. Amén.

<sup>7</sup> Uch síhwawi. Jesucristo bowarám tac ocsó cajc uch cutar racáyqueyra. Etya racayat bahnáquinat ub cut istáyqueyra. Jesucristo ruhwújác éyinat cat istáyqueyra. Wicayat cajcan teyan bisar bisar uw bahnáquinan abáy conáyqueyra. Ey ruhwújác sihwár ques abáy conáyqueyra. Etya wáqueyan uniro. Amén.

<sup>8</sup> Cara Sirat wacaro: “Ajatán récaram bahnác cuanír chájaquinro. Ajatán ubar ojcor cábara cat tin ayin binro,” wacaro. Sir eya récaram binro. Ah cat im éytaro. Bur cut suw cut cat im eyta rehcata binro. Eya ajcan urán bahnác cuitatro.

### *Una visión del Cristo glorioso*

<sup>9</sup> As Juan Sir cut Tet cut ba acu rabro. Ba cat, as cat is owár bin Jesucristo chihtá ques ruhwuro. Is owár bin Sir cara rehquey guitar cat ítataro. Is owár binat wácati, séoti Sir chihtá cácaro. As Juan Sir chihtá ehcúc ques icar yacúr ubut cajc guitar ahár itay áyjacro. Cajc ajca Patmos cutar ahár itay áyjacro. Sir chihtá ehcúc ques Jesucristo ojcor waquíc ques icar as usár chájacro. <sup>10</sup> Cara Jesucristo tamo sehwac riya Domingo riya, Sir Ajcan Cámuran Eyat as ajc béjcro. Etya beyar

cuitar aját ajc tewīc rahjacro. Ráhcuitan, rubar ajcyár ayir eyta teŵro. <sup>11</sup> Ajca teŵyat wajacro:

—Bahat itquey carit cuitar cuihsuwi. Eytá cuihsúr car Sir uwa puébloan cucuí bin cuitar aywi.

Sir uwa Efesio pueblo cuitar cat,  
 Sir uwa Esmirna pueblo cuitar cat,  
 Sir uwa Pérgamo pueblo cuitar cat,  
 Sir uwa Tiatira pueblo cuitar cat,  
 Sir uwa Sardis pueblo cuitar cat,  
 Sir uwa Filadelfia pueblo cuitar cat,  
 Sir uwa Laodicea pueblo cuitar cat, cuihsúr aywi,  
 wajacro.

<sup>12</sup> As quin eyta teŵic rahcuír, biyat teŵíctara istín acu asan sicor ac waaríc chájacro. Eytá ac waaríc ítitan, oca teb cucuí biyan ésatro. Oca teb eyan oro cuitar órojoc biro. <sup>13</sup> Oca teb tac icar uwan wan biyan ésatro. Uwan wan bi eyan oya enaran bi ques acat sohmásomro. Ey urá acat oro ahntará questajacro. <sup>14</sup> Ey cuisa cat cuis anar cat cuasayro. Obas anar cuasay bi éytaro. Cubar cuitar rirará cuitar bur cuasáy sucu cuasáy éytaro. Ey ub ítitan, oca cubar éytaro. <sup>15</sup> Quescar ítitan, bronce éytaro. Yera tam bijiy éytaro. Ehchí wan beo beo oror éytaro. Bronce ehchí oror éytaro. Eyat teŵíc ájqueyan rih rawá bi ajc éytaro. <sup>16</sup> Aját ítitan, ey at icar cuacúr ab uban cucuiro. Ey cac watur wihár espada ruhr bucayro. Ey acan rahs churot éytaro. Bahnác cuanír éytaro. Aját ítitan éytaro. <sup>17</sup> Aját ey istír, ay wini rehquít, as ey ques acor quehrjacro. Chinjaquin quehrír eyta quehrjacro.

Eyta quehryat eyat im at cut as butajacro. Eytá butár as quin wajacro:

—As cahm rooti jawí. Asan récaram cat eyro. Asan ubar cat ubar ojcor eyro. <sup>18</sup> Asan estají eyro. Chinjaquey asan eyro. Chinjaquin cuar ahra sicor estajiro. Asan bur cut suw cut estají rehcaro. Uw chin ayti síuquib asan eyro. Yar ayti síuquib asan eyro. Wahntar cajc cut ayti síuquib asan eyro. Cab oc icar ayti síuquib asan eyro. <sup>19</sup> Ahra bahat itquíc ey cuihsuwi. Ah cutar bitar rehquey cat yahncút bitar rehcata ey cat récaji ehcún ac cuihsuwi. <sup>20</sup> Cuacúr ub cucuí bi as at icar itchaquey aját ey chihtá ehcunro. Cuacúr ub cucuí itchaquey, Sir uw ac chihtá bequin éyinro. Oca teb cat úchtaro. Oca teb cucuí itchaquey Sir uw éyinro. Pueblo cucuíuitar Sir uw éyinro.

## 2

### *Mensajes a las siete iglesias: El mensaje a Efeso*

<sup>1</sup> 'Efeso pueblouitar Sir uw ac ayin uch cuihsuwi. Eycin ac Sir cuacúr cacum at cut ayin acu uch cuihsuwi: "Cuacúr ub cucuí at icar chac eyat wacaro. Oca teb cucuí bi tac icar bic eyat wacaro:  
<sup>2</sup> 'Baat bitara yájctara aját itro. Baat to ruoquic itro. Ba séoti tan uquic itro. Aját ítitan, baan ur ay bár bin owár tan wan réhtiro. Cahujinat imár ojcor "isra Jesús ima chihtá béquinro," waquít cat batro. Baat éyinat uní tevíctara, uní téwtitara istín ac úrojocro. Eytá uror ítitan, éyinat sucuar teviro.  
<sup>3</sup> Aját ba ítitan, as chihtá cájacan wácati tan úcaro. As chihtá cajac ques uwat ba ruhwúc cuar ba

urá tehmótiro. As chihtá séoti yajcaro. Baat eyta yajcayat yarisro.

<sup>4</sup> 'Eyta cuar baat uch yajcayat as ahní batro. Ba récaji as sehnacan to rehjecro. Cuatán ahra as sehnác etáy batro. Sehnác etáy bár cuácayat, as ahní batro. <sup>5</sup> Eytá cuácayat ba anto urá ay bár waati cuácayat behmarat bitara yajáctara síhwawi. Eytá sihwár, bucoy ur ay tehmowi. Récaji yajác bucoy yajwi. Eytair báreyra, as ba quin benro. Cur car ba oca teb uc tenro. Ur ay bár yajquey tehmoti yajquíc ques acsar ey chaca báreyra. <sup>6</sup> Cuatán uchra ay yajcaro. Nicolaítainat yajquey ba acura quehsí yajcaro. As acu cat éyinat yajquey quehsí yajcaro. <sup>7</sup> Biyin cucáj chétara, uch rahcwi. Sir Ajcan Cámurán Eyat Sir uw quin waquey rahcwi. Eyat waquít, bíyinan cuati aját eyin quin uch ajc waanro. Imár sácati acu Sir tihw cut bin caruc ub yayín acu ajc waanro,' wacaro." Efésoin ayin acu eyta wajaquey cuihsuwi.

### *El mensaje a Esmirna*

<sup>8</sup> 'Esmirna pueblo cuitar Sir uw séquaquin quin ayin uch cuihsuwi. Eyin ac Sir cuacúr cacúm at cut ayin acu cuihsuwi: "Récaji éyatan wacaro. Récaji eyan ubar ojcor cat ubar ójcotro. Eyan chinír car sicor estají yehnjác biro. Eyat wacaro: <sup>9</sup> 'Ba ruhwú yéhwican aját itro. Ba oya bár, ray bár, cajc bár réhquican aját itro. Eytá cuayin rehquíc cuar, Sirat ba sehnác rehquít ba oyin rayin yin áyayqueyra. Ba cahm icar su-cuar tewican aját itro. Súcuarinat imaran judíoин waquíc cuar, eyta cat batro. Judío bár cuácayat, éyinan Sisram ojcor Satanás ojcor conín acu owár

sécuaro. <sup>10</sup> Ba ruhwata cuar ey cahm rooti jawi. Récaji uch síhwawi. Sisram chihtá cuitar ba tac icar bin cahujín caquir cárcel icar tunáyqueyra. Ba urá tehmótatara téhmojortara istín acu eyta tunáyqueyra. Baan riy ucasi ruhwáyqueyra. Etya ruhwuyat ba yauwata tacat, as chihtá wácati jawi. Etya wácati rehcayat, aját ba asi jor etiti it áyinro. Asi jor carin yin áyinro. <sup>11</sup> Biyin cucáj chétara uch rahcwi. Sir Ajcan Cámurán Eyat Sir uw quin waquey rahcwi. Bíyinan cuati tan úcayatan, eyan cab oc icar áyajatro,’ wacaro.” Esmirnín ayin acu eyta wajaquey cuihsuwi.

### *El mensaje a Pérgamo*

<sup>12</sup> ‘Pérgamo pueblo cuitar Sir uw acu ayin uch cuihsuwi. Eycin ac Sir cuacúr cacum at cut ayin acu uch cuihsuwi: “Espada ruhr bucáy binat wacaro: <sup>13</sup> ‘Ba itic pueblo bitáratara, aját itro. Aját ítitan, Satanás ima erar uw cara chájacro. Aját ítit cat, baan as chiwa yinjác wácati rehcaro. Ba itic pueblo cuitar, Satanás ima pueblo cuitar, Antipas yaujacro. Antipas as ojcor ehcwayat ques ruhwür yaujacro. As chihtá wácati ques yaujacro. Etya yaujác tacat, baat cat as chihtá wácatiro.

<sup>14</sup> ‘Etya cuar baat chihtá cahují yájcajar bi yajcayat as ahní batro. Ba tac icar binat Balaam chihtán wan yajcaro. Balaamat Balak quin síwjacro. Etya siwyat, Balakat Israelin quin ur ay bár yajc áyjacro. Israélinat sirir órojoquey ac ruwa yaujác bi coh áyjacro. Cahujín wiwín owár isár yajc áyjacro, Balaam chihtá cuitar. Ba tac icar binat cat Balaam chihtán wan yajcaro. <sup>15</sup> Ba cahujinat cat Nicolaítain chihtá bar cájacro. Etya cágayat as ahní

batro. <sup>16</sup> Eyta cuácayat, ur ay bár yajquey etwi. Eytair báreyra, ay bár yajquey etítieyra, asan ba quin benro. Ba quin cur car ba cuécunro. As cac watur wihár espada ey cuit cuécunro. <sup>17</sup> Biyin cucáj chétara, uch rahcwi. Sir Ajcan Cámuran Eyat Sir uw quin waquey rahcwi. Eyat waquít, bíyinan cuati tan úcayat, aját eyin quin cuacúr abá cut bin cucuán wan cuasáy bi maná yayín ac wíquinro. Iran anto istiti bi wíquinro. Eyin quin ac ub cuas bi cat wíquinro. Ac ub eyuitar ayc cuihsúr wíquinro. Ayc cuihsujác ey anto istiy awuti binro. Ayc eyan istiyát istiti binro. Ac cáqueyat im istir binat itchácayqueyra,’ wacaro.” Pérgamoin ayin acu eyta wajaquey cuihsuwi.

### *El mensaje a Tiatira*

<sup>18</sup> ‘Tiatira pueblo cuitar Sir uw acu ayin uch cuihsuwi. Eyin ac Sir cuacúr cacúm at cut ayin acu uch cuihsuwi: “Sir wacjatán uchta wacaro. Uba oca cúbaran wan eyat wacaro. Quescara bronce ehchí órojoc binan wan eyat wacaro: <sup>19</sup> ‘Baat bitara yájctara aját itro. Aját ítitan, baat cahujín sehnacro. Ba urá Sir icar chájacro. Baat cahujín obir yajcaro. Baat séoti tan úcaro. Baat ahra ur ay yajcaro. Récaji ur ay yajacro. Ah cat ayan cuít yajcaro.

<sup>20</sup>’Eyta cuar baat uchta yajcayat, as ahní batro. Baat wiw istiy Jezabel urán wan bin owár ténero. Eytaténayat as ahní batro. Jezabel urán wan eyat im ojcor Sir chihtá ehcuquib wacaro. Eytawaquíc cuar eyat as uw quin ur ay bár yajquíc siwro. Eytaw uw cayar yajcaro. Eyin quin isár yajquíc siwro. Sirir órojoucey ac ruwa wijac ey cohquíc

siwro. <sup>21</sup> Aját Jezabel urán wan ey quin ajc uní cuit wajáquinro. Etya waquír car ey urá tehmóc acor to ítchacro. Etya cuar eyat urá tehmó cun bár rehquít tehmótiro. Imát etiti isár yajcaro. <sup>22</sup> Etya cuácayat aját eya awat cut restát cuac áyinro. Restá ji cháquinro. Ey jor bíyinatan isár yajcáyatan, aját eyin cat abáy ruhwunro. Eycin tayar yajquić etítitara, urá tehmótitara, eyin ruhwunro. <sup>23</sup> Ey chiwa aját tíwinro. Aját eyin tiwyat, eyin cuácayat, ajmár uw bahnáquinat it chácayqueyra. Uw ur wahitquib asan eyro. Imarat ur ay bár yajc etar ajatán cuecuc chihtá uwat istáyqueyra. Ur ay yajc tehmár ba obir yajquín chihtá cat istáyqueyra. Aját uw ur uror car etya yajquíc chihtá istáyqueyra. <sup>24</sup> Cuatán ba Tiatira uw cahujinat wiw ey chihtá cátiro. Ba cahujinat Satanás chihtá síntiro. Istiyát waquít, ey sinin acu bowan cuít yajcátacuano. Baat ey sinin acu bow yajti cuácayat ey chihtá cati cuácayat, aját ba quin uch wacaro. Baat Sir chihtá caba rahjacro. Etar aját acsar bitani síwajatro. <sup>25</sup> Baat sinjac ey wácati jawi. As cuacúr bin sicor cajc cut cuquic ocsó tas wácati jawi.

<sup>26-28</sup> 'Bíyinan cuati tan úcayat, bíyinatan as chihtá cabar tinic ocsó tas wácati yajcáyatan, aját éyinan cajc istiy cutar, cajc istiy cutar carin cháquinro. Etya chaquiruitar, yera tecan ator cuar cutar uw áyayqueyra. Uwat eyin chihtá cati rehcayat ques, éyinat uw ey cuácayqueyra. Tabir ruca quehwír etya, éyinat uwa cat etya cuácayqueyra. As Tetát as quin uw ayin wajác etya aját cat eyin quin uw ayin ajc waanro. Uw ayin ajc waacayat cat aját ey quin cuanocó wíquinro. <sup>29</sup> Biyin cucáj chétara, rahcwi.

Sir Ajcan Cámurán Sir uw quin waquey rahcwi,’ wacaro.” Tiatirain ayin acu eyta wajaquey cuihsuwi.

## 3

### *El mensaje a Sardis*

<sup>1</sup> ’Sardis pueblouitar Sir uw acu ayin ac uch cuihsuwi. Eyin acu Sir cuacúr cacum at cut ayin acu uch cuihsuwi: “Sir Ajcan Cámurán Ey pueblo cucuí bin quin ima cacmín áyquibat wacaro. Cuacúr ab ub cucuí bin yéhñqueyat wacaro: ‘Baat bitara yájctara aját itro. Uwat waquít, baan estají wácuano. Baat Sir chihtá yajc wácuano. Etya waquíc cuar ba chéinan wanro. Baat Sir chihtá yájtiro. <sup>2</sup> Etya cuácat behmár ojc seja jawi. Bucoy Sir chihtá yajwi. Ba bahnác cuácate cab cuácat, ba anto yarti cuat sicor chihchír chi jawi. Urá ji sicor chawi. Sicor Sir chihtá ay yajwi. Aját ítitan, baat bitara útara yájqueyan Sir ub cahmor cábai batro. Etya bira Sir chihtá ay yajwi. <sup>3</sup> Chihtá baat récaji cájaqueyan, récaji rahjáqueyan, tan chinti etiti síhñawi. Ey chihtá cawí. Urá ay bár yajquey tehmowi. Tehmáruitar ojc seja jawi. Eytair báreyra, ba ojc seja chátieyra, ¿asan sicor cajc cutar ba cuecway béjequi? ¿Ba quin istiti cúwajaqui? Baatán as bitat cuwátatara istiti cuar, ¿ba quin cúwajaqui? Besin istiti cur eyta ¿as cat eyta cúwajaqui?

<sup>4</sup> ’Baat eyta ur ay bár yajquíc cuar, ba tac icar bin cahujinat ur ay yajcaro. Eyinat cahujinat ur ay bár yajquir eyta yájtiro. Eyinat ur ay bár yajti etar oya timá bár bin owir éytaro. Eyin ur ayan cábaro. Etya

rehquít eyin as owár ojquír abir tewáyqueyra. Eyi-nan Sir tayar bár etar eyta tewáyqueyra. <sup>5</sup> Bíyinatan ima cayar yajc aytí cuácayat, bíyinatan cuati tan úcayat éyinan oya cuas bi oya timá bár bi owir eyta tayar bár chácayqueyra. Eyi-nat eyta yajcayat, aját eyin tamo tan chinti séhwanro. Biyin Sir owár etiti ítatatará, eyin ajca carituitar cuihsujac. Eyi-nat cayar yajc aytí cuácayat, cuati tan úcayat, ajc cuihsujáy ey aját sutá báreyra. Sutiti cuar aját Sir quino cat, Sir cuacúr cacmín quino cat, “Uyin ajmár chíwaro,” waquinro. <sup>6</sup> Bíyinat cucáj chétara, rahcwi. Sir Ajcan Cámuran Eyat Sir uw quin waquey rahcwi,’ wacaro.” Sárdisin ayin acu eyta wajaquey cuihsuwi.

### *El mensaje a Filadelfia*

<sup>7</sup> ‘Filadelfia pueblo cuitar Sir uw acu ayin uch cuihsuwi. Eyi-n acu Sir cuacúr cacum at cut ayin acu uch cuihsuwi: “Sir imáy eyat wacaro. Uní téwquibat wacaro. Eyat Davidat uw ayir eyta eyat cat eyta ayro. Davidat ayir eyta ayic etar uwat ey chihtá cuitar caba yajcátar. Uwat ey chihtá cuitar yajcáy yinyat, bíyati rehratí eyta yajti acu síwajatro. Eyta cat eyat uw quin yajc aytí síuyat, bíyati rehratí bi yájcájatro. Eyat ajc waati etar bitách yájcájatro. Eyat wacaro: <sup>8</sup> ‘Baat bitara yájctara aját itro. Aját íitan, ba cárini batro. Eytá cuar baat as chihtá wácati rahcwi. As chiwa yinír tehmoti im eyta tan úcaro. Eytá cuácayat baat icúr bi yajquín síhwactara ajc waajac. Ajc waacayat, rehratí ba quin yajc aytí síwajatro. <sup>9</sup> Aját uch yajquinro. Aját Satanás chiwa ajc chíwinro. Eyi-nat imár ojcor judío-in awúc cuaquir eyta cat

batro. Eyinat tewyat sínjacro. Aját eyin quin ba chihtá cac áyinro. Aját eyin quin chihtá uchta it áyinro. Aját ba sehnacan cuít chihtá eyin quin it áyinro. <sup>10</sup> Baat as chihtá wácati tan újacro. Etya chihtara baat as chihtá wácati acu aját ba guitar yajquinro. Cajcan teyan bahnác guitar bahnaquin ruhwúc cab cucayat, ba guitar yajquinro. Cajc uch cut itquin ruhwúc guitar cab cuwátaro. Etya cab cucayat ba síwinro.

<sup>11</sup> 'Asa birách rehti ba cajc cut cuwinro. Asan ba quin cuwín wac bahjaquey ahrun birách rehti cuwinro. Etya cuácatay baat chihtá cájaquey wácati im eyta yajwi. Waca téyeyra, Sirat ba quin wícata ey cahujinat ba ohnor síwayqueyra. <sup>12</sup> Bíyinan cuati tan úcayatan aját éyinan Sir owár cuacúr it áyinro. Erar ityat sícotra tehmó báreyra. Erar bin sícotra uca báreyra. Aját eyin ubcar guitar as Sir ajc cuihsunro. As Sir pueblo ajc cat cuihsunro. Jerusalén ibsoy bi ajcan eyin ubcar guitar cuihsunro. Jerusalén eya cuacúr Sir owár bin ayir chácayqueyra. Ajmár ajca tehmár ey cat eyin ubcar guitar cuihsunro. <sup>13</sup> Bíyinatan cuacúr chétara, rahcwi. Sir Ajcan Cámuran Eyat Sir uw quin waquey rahcwi,' wacaro." Filadélfiain ayin acu eyta wajaquey cuihsuwi.

### *El mensaje a Laodicea*

<sup>14</sup> 'Laodicea pueblo guitar Sir uw acu ayin uch cuihsuwi. Eyin acu Sir cuacúr cacum at cut ayin acu uch cuihsuwi: "Ur istanác téwqueyat wacaro. Tehmoti eyat wacaro. Tehmoti ehcúqueyat wacaro. Cajc cat, cuacúr abá cat bahnác cuan ayjac eyat wacaro: <sup>15</sup> 'Baat bitara yájctara, aját

itro. Aját ítitan, baat as chihtá conu cájaquey waca tétiro. Baat waca teti cuat, ac sar cat ráhctiro. Etya rehcayat, ay batro. Baat rahcuí cun bártara bahnác etata binro. Cuat rahcuí cúntara, ur istán cuitar bahnác rahcuata binro. <sup>16</sup> Etya chihtara ba urá bucáy cut rahcuíc etar, aját ba ria bár yehw tenro. <sup>17</sup> Baat behmár ojcor wácuano: “Isan oyin ráyinro,” wácuano. “Isat to sécuajacro. Isra icuri tányotiro,” wácuano. Etya wac cuar, istiti rabar wacaro. Baan cuáyinro. Oya bár ray bár siati binan wanro. Ub bár binan wanro. Ba urá bár chihtá bár binro. Baat sinin yajquít cat batro. Etarwan istiti rabar wacaro. <sup>18</sup> Baan icúr bártara aját itro. Uwat istiy quin oro oca cut cuanjác bi rar eyta aját ba quino éytaan wan urá wíquinro. Ey wícayat baat ay síhwtaro. Ba siati rehti acu oya cuas bi wahr eyta ba uw cahmar rooti acu as quin ba cuitar tayar túnayta acu chiwi. Ba ub cuitar istayta acu ub sec wahr eyta aját ba quin chihtá istá ayin acu chiwi.

<sup>19</sup> Aját sehnác eyin quin ajc uní cut wacaro. Eycinat tayar yajcayat ques cuécunro. Etya bira ur istán chawi. Ur ay bár ey tehmowi. <sup>20</sup> As urá úchtaro. As ba querat acor cur car, ba quin ténero. Baat as ajc rahcyat as acu querat waacayat as ba quin raúwinro. Ba owár ira yayinro. Rahra cat baat asi jor yayáyqueyra. Isan ay íwotaro.

<sup>21</sup> Bíyinan cuati tan úcayatan, eyin asi jor uw ayin ajc waanro. Ajmarát burbar yajquír car as Tet chor uw ayin yehnjác eyta uw áyayqueyra. <sup>22</sup> Bíyinan cucáj chétara, rahcwi. Sir Ajcan Cámuran Eyat Sir uw quin waquey rahcwi,’ wacaro.” Laodicéain ayin acu eyta wajaquey cuihsuwi. As quino eyta cuihsún wajacro.

## 4

*La adoración en el cielo*

<sup>1</sup> Etar aját ítitan, cuacúr abá cuitar querat waa-jacro. Eytá wa técyat, rubar ajcyár eyta tewjác eyat bucoy as quin tewjacro. Uchta wajacro:

—As quin cuacúr rawí. Aját ah yahncút bitara útara rehcátatara ey chihtá ba quin récaji ehcunro, wajacro.

<sup>2</sup> Eytá wacayat acat Sir Ajcan Cámuran Eyat as béjecro. Ey urá cut cuacúr abá cut cujacro. Erar cuacúr abá cur ítitan, cara báncuan ésatro. Ima cat ey cuitar chihrír itro. <sup>3</sup> Ey ojc ey ítitan, ac rayan wanro. Ac rayan jáspean wanro. Cornalinan wanro. Ey banco rúhracat tucuar cat ésatro. Tucuar eya ac ray esmeraldan ojcan wanro. <sup>4</sup> Cara banco rúhracat cahujín banco cat ésatro. Banco veinticuatro ésatro. Banco ey cuitar werjayín cuiisa veinticuatro itro. Werjayín eyin oya cuas bi tas cuar itro. Eyin cuísofar churotán chero. Oro churotas cuar itro. <sup>5</sup> Cara banco cuitar bin cuiran bucoy bucoy cuasoro. Ajca tevíc cat rahcro. Cuir cat quecaro. Cara banco acat oca cucuí anir cuacúr chájacro. “Oca cucuí bin,” wacayat Sir Ajcan Camur Ey ojcor wacaro. Sir Ajcan Cámuran Eyat pueblo cucuí bin quin ima cacmín ayro. <sup>6</sup> Banco ey acat áwatan bahnác ehchí turú sicutacro. Yacuran wan áwatan ehchí turú sicutacro. Awat ey vídrioan wanro.

Cara banco, ey rúhracat rahrhay cutar rahrhay cutar estají bin cuiisa bacayro. Estají bin éyinan istín ac uba sasasro. Tancar wihrá cat icar wihrá cat uba sasasro. <sup>7</sup> Estají istiy eyan cohtocuan wanro. Estají istiy eyan vacan wanro. Estají istiy eyan

uw acan wanro. Estají istiy eyan buwán wanro. <sup>8</sup> Cohtocuan wan bi eyay cat, vacan wan bi eyay cat, uwan wan bi eyay cat, buwán wan bi eyay cat ajcra wan wan éctara térayro. Istiyáy cat, istiyáy cat ajcra wan wanana rahr ray wihár cat, tánsara cat cuitchín cat ub sasasro. Eyinat ricar cat, cheycar cat Sir tamo sihwā rabar etiti cohwo: “Caru, Siru bah urán tanan chihchirán bahnaquin cuitattro. Récaján eyta, aha cat eyta, yahncút cat im eyta rehcáyqueyra. Ba ur ayan tahnacro.” Eyta teŵa rabar etiti cohwo.

<sup>9</sup> Estají éyinat búcoyan búcoyan Sir acu ay cohwo. Ey ojcor ay teŵro. Ey quin “oquéy” wacaro. <sup>10</sup> Eyta cohwyat acat werjayín cuisa veinticuatro éyinat ey acam cuisa bahujacro. Ey tamo sihwā rabar cuisa bahujacro. Etiti bur cut suw cut estají rehcata ey tamo sihwā rabar imár churotán cara ques cahm chájacro. Churotá eyta chaquir car tajacro. Tan ac wajacro:

<sup>11</sup> Siru, Caru, bahat cajcan, ican, cuacúr abán, bahnác waquír chájacro. Behmá urá cut bahnác cuanín acu ítin acu chájacro. Bahat eyta chajac etar uwat bah ajcá ji chácataro. Ay síhwataro. Bah ajcan cámaran tahnác wacátarro.

## 5

### *El libro y el Cordero*

<sup>1</sup> Etar aját ítitan, cara bancouitar itic ey at icar cáritro. Carit cay ey icar rahr ray wihár cat rahr ray wihár cat cuihsujacro. Cuihsúr car wir wir bacocro. Bacór arúmuitar ánjacro. Tan ojcor uwat wahititi acu eyta ánjacro. Arúmuitar ec ojcor ec

ojcor icar cucuí ecsar ecsar ánjacro. <sup>2</sup> Aját carit ey istír car aját rahcuít, Sir cacúm chihchirán cuít biyat bahnaquin cucajá acat ajcyaran to cohwro. Uch tewín acu cohwro:

—¿Rehratán carit arúm cuit anjac rícuátaca? ¿Carit istín acu rehrán ur ayan cábaqui? tewá rabar cohwro.

<sup>3</sup> Sir cacfám eyta cohwyat, carit ey rícuán acu úbistii batro. Cuacúruitar cat, cajc cutar cat, wahntar cajc cutar cat carit eya rehratí rícuajatro. Rehratí wahítajatro. <sup>4</sup> Eyta cuácayat asan to ojocro. To conjacro. Biyat carit ey rícuajar etar biyat ístajar etar, ojocro. <sup>5</sup> Eyta ócayat werjayín eyin úbisti binat as quin wajacro:

—Oti jawí. Conti jawí. Cue rehti jawí. Uní wacaro. Judá bomcar cohná bahjác úbisti bin David bómbara caran to eyat burbar yajacro. Uwat ey ojcor “León,” awuro. Eyat burbar yajác rehquít carit arúm cuit anjac ey rícuata binro. Carit wahítata binro, wajacro

<sup>6</sup> Etar aját ítitán, cara banco cac cahmar Obas cat ésatro. Eyan cuisa bacáy estají bin tac ícatro. Werjayín tac ícatro. Obas ey ítitán, uwan Sir ub cahmor tayar bár chaquin acu yaujáquinro. Uw tayar bár chaquin acu yaujác cuar sicor yehnjáquinro. Eyayan cuiscar cucuiro. Ub cat cucuiro. “Ub cucuí” wacayat, Sir Ajcan Camur Ey ojcor wajacro. Ajcan Cámurán Eyat ima cacmín cucuí bin cajcan teyan bahnácuitar áyjacro. <sup>7</sup> Obas eya cara banco acor cucayat, ey cutar itic eyat carit wíjacro. <sup>8</sup> Carit ey cágayat estají bin cuisa bacáy binat cat, werjayín cuisa veinticuatro binat cat, Obas ey ques acat cuisa bahujacro. Werjayín istiyát cat, istiyát cat

ajcra wan wanana arpa cat oro soya cat yehwro. Oro soya sar inan ay biro. Inan ay bi eyan Sir uwat Sir ojcor conic eyro. <sup>9</sup> Werjayín eyin cuisa bahúr ay tajacro. Anto ay tati bin tajacro. Ta rabar wajacro:

Bahan eyro. Uwat bah yaujác rehquít, bah ab bijác rehquít, carit ey arúm cuitar ánjaquey waan acu, ricuán acu, wahitín acu, tan acu, bah ur ayan cábaro. Behmá chinír cutar, behm ab bir tehmár cutar, isan Sir acu, Tet acu sasá waajacro. Uw bahnaquin sicar bin, birar urar cajc istiy cutar ajc ajquír tew̄quin sicar bin, cajc istiy cutar ajc ajquír tew̄quin sicar bin, uw síujacro. Siray Tetáy chaquin acu eyta síujacro. <sup>10</sup> Siwir car carin sacerdótein chájacro. Sir ac ruón acu, cajc cutar uw ayin acu chájacro.

<sup>11</sup> Etar aját ráhcuitan, Sir cacmín ricá to binat cohwo. Sawú báhnajar binat cohwo. Sir cacmín eyin cara banco rúhracatro. Estají bin rúhracatro. Werjayín rúhracatro. <sup>12</sup> Aját éyinat cohwquey ráhcuitan, uchta waquín ac cohwo:

Obasan wan yaujác ey ur ayan cuitro. Etya cuácyat Sirat Tetát ey quin urán ajcan, oyan rayan, urán bowán, canarán chihchirán cuít bi, churotán ayan cuít bi yarís wíjacro. Caba wíjacro. Uwat ey tamo ay síh̄wataro. UW quin ey ojcor ay tew̄átaro.

<sup>13</sup> Etar aját ráhcuitan, cuacúr itquin bahnáquinat cat, cajc cutar itquin bahnáquinat cat, wahntar cajc cut itquin bahnáquinat cat, yacúr sar itquin bahnáquinat cat, estají bin bahnáquinat eyin ojcor ay tew̄jacro. Tew̄a rabar wajacro:

Cara banco guitar itic ey itit cat, Obas itit cat, eyin bahnaquin cuitattro. Uwat eyin ojcor ay tewátaro. Eyin tamo cárinan cuít síhwataro. Eyin ajcá ji chácataro. Eyin tamo urán ajcan cuít bi síhwataro. Bur cut suw cut eyta síhwataro.

<sup>14</sup> Etya tewá rabar cohwyat, estají bin cuisa bacáy binat wajacro:

—Etya jawí. Etya yajwí, wajacro.

Etya waquíc cohwyat, werjayinán ey acat cuisa bahujacro. Etya bahúr cat wajacro:

—Bah is Sitro. Bah is cáraro, wajacro.

Aját ítitan, ráhcuitan, éytaro.

## 6

### *Los siete sellos*

<sup>1</sup> Etar aját ítitan, Obas eyat arúm cuit carit récaram anjac ey rachacro. Etya rachyat estají bin úbistiyat tewic aját rahjacro. Eyat téwqueyan cuira quer ajca éytaro. Eyat wajacro: “Wahitay rawí,” wajacro. <sup>2</sup> Etya wacayat, aját ítitan, caballo cuas bi racaro. Caballo guitar raquey chimár chi racaro. Ey racayat, ey cuísofar churot cat chájacro. Etya chácayat, eyat burbar yajcáy bijacro. Uw cuacay bijacro. Aját ítitan, ráhcuitan, éytaro.

<sup>3</sup> Etar Obas eyat arúm cuit carit icar bucoy anjac ey rachacro. Etya rachyat estají bin úbistiyat tewic aját rahjacro. Eyat wajacro: “Wahitay rawí,” wajacro. <sup>4</sup> Etya wacayat, aját ítitan, caballo buw bi racaro. Caballo guitar raquey quin espada cumac bi wíjacro. Eyat uch yajquín acu ajc waajacro. Uw rahra rahra tecua ayin acu ajc waajacro. Uw rahra

rahra espada cuit yau ayin acu ajc waajacro. Aját ítitan, ráhcuitan, éytaro.

<sup>5</sup> Etar Obas eyat arúmuitar carit icar bawoy anjac ey rachacro. Etya rachyat estají bin úbistiyat tewic aját rahjacro. Eyt wajacro: “Wahitay rawí,” wajacro. Etar aját ítitan, caballo bacsoy bi racaro. Caballouitar raquey at icar chacha jiro.

<sup>6</sup> Etya istír aját rahjacro. Estají bin tac icar bin tewquey rahjacro. Téwqueyat wajacro:

—Canár riy istiy yajquír tayar tunyatuitar ritút libra bucatan wahcaro. Ey tunyatuitar cebada libra teray wahcaro. Cuatán aceite cat chistár ub bacú bahn ayti jawí, wajacro.

Aját ítitan, ráhcuitan, éytaro.

<sup>7</sup> Etar Obas eyat arúmuitar carit icar bacoy anjac ey rachacro. Rachyat estají bin úbistiyat tewic aját rahjacro. Eyt wajacro: “Wahitay rawí,” wajacro. <sup>8</sup> Etya wacayat, aját ítitan, caballo tam bi racaro. Caballo eyuitar raquey ajca “Chein,” awuro. Ey questoc istiy cat racaro. Questoc rac ey ajca “Wahntar cajc” awuro. Eyn uw tiwin acu ajc waajacro. Cajcan teyan bahnácuitar cuias bacáy sícara bin úbisti, cuias bacáy sicar bin úbisti, tiwin acu ajc waajacro. Espada cuit tiwin acu, yayat tiwin acu, restát tiwin acu, cohtócuatan báhabatan tiwin acu ajc waajacro. Aját ítitan, ráhcuitan éytaro.

<sup>9</sup> Etar eyat arúmuitar carit icar eswoy anjac ey rachacro. Etya rachyat, aját ítitan, sácajaquin ajcan ératro. Biyin Sir chihtá wácati ques tíwjactara, bíyinat Sirat yajác ojcor etiti waquíc ques tíwjactara, eyin sácajaquin ajcan ératro. Sir tamo sihwán ac ruwa wahníc yera acar ácotro.

<sup>10</sup> Eynat ajcyaran to cohvír wacaro:

—Siru, caru, bah bahnauquin cuitatro. Bah ur ayan tahnacro. Ba urá istán cuít yajcaro. Is tiwjac ques rahra ¿eyin bitat cuácataqui? ¿Is yaujác éyinan, cajc uch cut itic éyinan bitat cuácataqui? wacaro.

<sup>11</sup> Eyinat eyta wacayat, eyin owin ac oya cuas bi wíjacro. Oy eyan enaran ques acat sohmásomro. Etya wiquir car eyin quin wajacro:

—Recan inic rehwí. Inic tan jawí. Jesús chihtá ehcuquin cahujín secuac acor ítuwi. Jesús chihtá ques tíwata eyin bahnauquin tiwic acor inic ítuwi, wacaro.

Aját ítitan, ráhcuitan, éytaro.

<sup>12</sup> Etar eyat arúm icar terwoy anjac ey rachyat, aját ítitan, iyaran abá yehnro. Rahs cat bahnác tinro. Rahs cat cucúr eyta tinro. Sihyór cat bahnác buworo. Sihyór ab eyta buworo. <sup>13</sup> Cuacúr ub cat ic icar tijcaro. Séroan abá cacayat higuera caruc ub tijcár eyta, cuacúr ub cat eyta tijcaro. <sup>14</sup> Cuacúr abá cat bahnác bár jácaro. Carit bacór eyta, cuacúr abá cat eyta bacór car bár jácaro. Rirará cúbaran bahnác tehmár sicor cajc istiy cutar cajc istiy cutar chácaro. Yacúr ubut cajc bahnác awat istiy cut awat istiy cut chácaro. <sup>15</sup> Etar cajcan teyan bahnác cuitar caran cuít binan, caran etach bár binan, réyinan, soldado cárinan, óyinan, ráyinan, chihchír binan, cacminán, cuáyinan, imár canar ruóquinan, uw bahnáquinan rirará cahm cat, siyoá uchar icar cat ruhcro. Eyinan ehurát ruhcro. <sup>16</sup> Ehurát cohwro. Rirará cuit siyó cuit cohwro. Uw cuit cohwír eyta, éyinat rirará cuit siyó cuit eyta cohwro. Cohwá rabar wacaro:

—Is arcutar tijcawi. Is anwi. Is ruhcwi. Cara banco cuitar ítqueyat is istiti acu is anwi. Obasat

tecua cahm is ruhcwi, wacaro.

<sup>17</sup> Uwat Sir tayar yajác ques cuecucuitar bar cab cucaro. Ey ricar cuanicuitar cab cucaro. Etya cuácatayat, Sirat cuecuc cahm rehrí sera waájatro. Aját ítitan, ráhcuitan, éytaro.

## 7

### *Los señalados de las tribus de Israel*

<sup>1</sup> Etar aját ítitan, Sir cuacúr cacmín cuisa bacayo. Cajcan teyan ajc istiyuitar cat, ajc istiyuitar cat, ajcra wan wanen ajc rúhracat itro. Erar ita rabar sero ca áytiro. Cajc cutara cat, yacúruitar cat, carucuitar cat sero ca áytiro. <sup>2</sup> Etya cuaquir Sir cacum istiy cat raha raquí wihr bin raquic itchacro. Cacum eya Sir ima ajc cuihsún sello ji racaro. Etya raquí cohjacro. Sir cacmín bacay bin cuit ajcyaran to cohjacro. Cajc cat, yacúr cat ruhwata bin cut cohjacro. <sup>3</sup> Cohwá rabar wajacro:

—Recan cajc cat, yacúr cat, caruc cat catoti jawí. Isat Sir ima uw ubcaruitar sellou cuihsúc acat tas catoti jawí, wajacro.

<sup>4</sup> Etar uw ubcar bita bin cuih sujáctara sawúc, aját rahcro. Aját rahcuít, israelin cuisa ciento cuarenta y cuatro mil bin ubcaruitar cuihsu jacro, Sir imay bin ehcún ac. <sup>5</sup> Judá bomcarín cuisa doce mil bin cuih suro. Rubén bomcarín cuisa doce mil bin cuih suro. Gad bomcarín cuisa doce mil bin cuih suro. <sup>6</sup> Aser bomcarín cuisa doce mil bin cuih suro. Nef talí bomcarín cuisa doce mil bin cuih suro. Manasés bomcarín cuisa doce mil bin cuih suro. <sup>7</sup> Simeón bomcarín cuisa doce mil bin cuih suro. Leví bomcarín cuisa doce mil bin cuih suro.

cuihsuro. Isacar bomcarín cuisa doce mil bin guitar cuihsuro. <sup>8</sup> Zabulón bomcarín cuisa doce mil bin guitar cuihsuro. José bomcarín cuisa doce mil bin guitar cuihsuro. Benjamín bomcarín cuisa doce mil bin guitar cuihsuro. Aját ráhcuitan, ítitan, éytaro.

*La multitud vestida de blanco*

<sup>9</sup> Etar aját bucoy wahitchacro. Aját ítitan, ricán to binro. Ricán to bin etar uwat sawú báhnajatro. Etya sécuajaquinan uw bahnaquin sícara bin, birar urar sicar bin, birar urar sicar bin, ajquír teŵquin sicar bin, ajquír teŵquin sicar bin, pueblo istiy sicar bin, pueblo istiy sicar bin, cajcan bahnác cutar sicar bin sécuajacro. Eyin bahnaquin cara banco acat, Obas acat itro. Oya cuas bi tas cuar itro. Ator cat sincuach cay yehwro. <sup>10</sup> Eyin erar ita rabar ay bár cohwá rabar wacaro:

—Uw Síuquib Siran eyro. Uw Síuquib Obasan eyro. Sir eye banco caray bin guitar itro, waca rabar cohwro.

<sup>11</sup> Etya wacayat Sir cacmín bahnaquin cara banco rúhracat, werjayín rúhracat, estají bin rúhracat itro. Etya ita rabar, cara banco ques acat eyin cuisa bahuro. Bahúr car Sir ojcor wacaro:

<sup>12</sup> Amén. Is Sir ojcor uwat ay teŵata binro. Ey ojcor ay wacata binro. Ey ojcor urán bowán cuít wacata binro. Ey quin “Oquéy, bah ur ayro,” wacata binro. Eya ajcá ji býata binro. Ey tamo “eyan wan ajcan toro,” síhwata binro. Bur cut suw cut eyta teŵata binro. Amén.

<sup>13</sup> Etar werjayín úbistiyat as quin wajacro:

—Bahat oya cuas bi ówqueyin istiti óraro. Etar bah quin ehcunro. Rehríntara, biscán bíntara, aját ehcunro. ¿Bah quin ehcwátaica? wajacro.

<sup>14</sup> Etya wacayat wajacro:

—Ee. Ehcuwi, wajacro.

Etar eyat wajacro:

—Uw éyinan to ruhwújacro. Etya ruhwújác cuar Sir chihtá wácati rehjecro. Obas Jesucristoat uw eyinuitar Sir tayar tunin chinjacro. Ey ab bijacro. Etya chinjác etar Sirat uw eyin ítitan, tayar batro. Oyan cuasan ehchí bin chaquir éytaan wan eyin cat tayar bár ay chajacro, -wajacro-. <sup>15</sup> Etya cuácatayat éyinan Sir cara banco acat itro. Eyn ricar cat, cheycar cat Sir ajcá ji beyin acu bítara útara ay yajcaro. Etya cuácatayat cara banco cuitar ítqueyat eyin obir yajcáyqueyra. Uwat ruhwuti acu iman eyin owár ítayqueyra. <sup>16</sup> Etar eyin búcoyra yayí rehca báreyra. Cuc wini rehca báreyra. Rahs ribrát cuaca báreyra. Ribír quicrát cuaca báreyra. <sup>17</sup> Obas cara banco acat itic eyat eyin obir yajcáyqueyra. Uw obas cayibat obas obir yajquír eyta, Obas eyat cat eyin eyta obir yajcáyqueyra. Eytat uw eyin rih ay bi cajc awat yehw beyáyqueyra. Rih ey yahcayat etiti ítayqueyra. Eyn cueat ócayat, Sirat sicor cue bár tan wan chácayqueyra, wajacro, werjáy eyat as quino.

## 8

### *El séptimo sello y el incensario de oro*

<sup>1</sup> Etar Obasat arúm cuit carit icar cucwa anjac ey rachacro. Etya rachyat, uwan icúr bár bahnác ajc bár sarac chajacro. Ajc bár sarac chaquir media

hora rehjecro. <sup>2</sup> Etar aját ítitan, Sir cacmín cuisa cucuí bin ésatro. Cacmín eyin Sir quemir itro. Cacmín eyin quin rubar cucuí wícaro. <sup>3</sup> Etat Sir cacmá istiy cat rajacro. Wiquír car Sir ac ruwa wahníc yera acar intac ítchacro. Eya oro soya chi wijacro. Inan ay bi wahnín soya chi wijacro. Etya wicayat ey quin inan ay bi wahnín ac to wijacro. Inan ay bi mesauitar wahnayta acu wijacro, cara banco acat. Sir uwat Sir ojcor cona rabar wahnayta acu wíjacro. Etya wahná rabar uwat Sir tamo síhwaro. <sup>4</sup> Etar cacmát inan ay bi wahnyat, iyar eyra cuacúr Sir quin bijacro. Uwat Sir ojcor conyat owár iyar eyra Sir quin cujacro. <sup>5</sup> Etar cacum eyat oro soya sar oca cucúr buway sárasar bin chajacro. Ruwa wahnín acar cutar bin oca cucúr uquir chajacro. Etya chaquir, oca cucuran cajc cutar cui téjcro. Etya cuicayat cuir cat quejecro. Ajcyár cat to chajacro. Chihcuát cat cuasojocro. Ihýár cat yehnjacro.

### *Las trompetas*

<sup>6</sup> Etar Sir cacmín cucuí éyinat rubar cuhwín yin-jacro.

<sup>7</sup> Sir cacum récaji eyat ima rubar cuhjacro. Etya cuhcayat cuacúr bin ábarit quihujacro. Abarit eyan oca chaw, ab chaw icauitar quihujacro. Etya quihwíuitar cajca ica bitác istiy cuwayta acat wahnajacro. Caruc cat bitác istiy cuwayta acat wahnajacro. Banar cat bitác istiy cuwayta acat wahnajacro.

<sup>8</sup> Etar Sir cacum bucoy eyat ima rubar ey cuhjacro. Etya cuhcayat rirar cumac biyan wan bahnacuitar oca ánjacro. Etya anir yacúr icar

téjecro. <sup>9</sup> Etya técayat, yacúr bitác istiy cuwayta acat ab buwayan wan waajacro. Yacúr ruwa bitác istiy cuwayta acat ricúm bitác istiy cuwayta acat tínjacro. Canó cat, lancha cat, barco cat bitác istiy cuwayta acat wahyujacro.

<sup>10</sup> Etar Sir cacúm bawoy eyat ima rubar ey cuhjacro. Etya cuhcayat, cuacúr ub úbisti tijcajacro. Rih cucar bitác istiy cuwayta acat guitar, riw cheri bitác istiy cuwayta acat guitar tijcajacro. Etya tijcár cat bívara bívara rih aujacro. <sup>11</sup> Cuacúr ub ey ojcor “quiquír,” awuro. Quiquir ub rih icar tijcajác etar uwa to binat rih quiquir bin yahr car sácajacro.

<sup>12</sup> Etar Sir cacúm bacoy eyat ima rubar ey cuhjacro. Etya cuhcayat, rahs cat, sihyór cat, cuacúr ub cat ruhwújacro. Etya ruhwuyat, rahsi siran sihyór siran bitác istiy cuwayta acat tínjacro. Ricar cutar cat rahsan riy istiyí cuti tínjacro. Cheycar cutar cat sihyór sir cat cuacúr ub sir cat wan sarqui rehti tínjacro.

<sup>13</sup> Etar aját wahitír car rahjacro. Cuacúr guitar buwá be rabar ajcan to cohwič rahjacro. Aját rahcuít, buwá eyat wacaro: “Uchtarun cuero. Uwa cajc cutar ica cutar ítquinan to ruhwáyqueyra. Sir cacmín bay binat awan rubar cuhíc guitar, to ruhwáyqueyra,” wacaro.

## 9

<sup>1</sup> Etar Sir cacúm eswoy eyat ima rubar ey cuhjacro. Etya cuhcayat, aját íitan, cuacúr abá guitar bin ub ic icar tijcajác ey ératro. Ub eyta tijcajác ey at icar llave wíjacro. Ucar unrur cuw báhnajar bi querat uron acu llave wíjacro. <sup>2</sup> Etya wícayat querat ey waajacro. Ucar unrur cuw báhnajar bi

querat waajacro. Waar car iyar abáy waajacro. Tabir ruca to bin wahnícuitar iyar yehnár eyta uchar ey tansar binan iyar eyta yehnjacro. Iyar to yehníc rehquít rahsan bahnác cay ánjacro. Cuacúr abá cat ánjacro. Ehta anjac rehquít tínjacro.<sup>3</sup> Iyar ey tansar surit cat to yinjacro. Surit éyinat tajquín acu siya wíjacro. Caruw siya eyta wíjacro. Surit éyinan cajc cutar quiujacro.<sup>4</sup> Surit eyin quin banar cat, caruc cay cat ruhw áytiro. Cuat biyin ubcar icar Sir ima ajcan cuihsútara, éyina ruhwún acu ajc waajacro. Sir imáy bár éyina ruhwún acu ajc waajacro.<sup>5</sup> Sihyór esí ac ruhwún acu ajc waajacro. Caruwát uw tajquír eyta súritat cat eyta tajquín acu ajc waajacro. Ruhwúc cat ruhwún acu ajc waajacro. Ehta tajquíc cuar uw bahnác chinra yar áytiro.<sup>6</sup> Ehta ruhwúc cab cucayat, uwan saca racar rehcáyqueyra. Abáy ruhwúc rehquít saca racar rehcáyqueyra. Saca racar cuar, saca báreyra. Uw ima saca racar isóyqueyra. Ruhwúc tamor saca racar isóyqueyra. Ehta saca racar isóc cuar, saca báreyra.

<sup>7</sup> Surit eyin úchtaro. Eyinan cabálloan wanro. Uwat rahra rahra tec quejn cahmor imár caballo cuati acu óroro. Surit eyin caballo eyta órojocan wanro. Eyin cuísofar oro churotán wan chájacro. Eyin acan uw aquir quattro.<sup>8</sup> Eyin cuis anará uw wiwíñayan wanro. Eyin ruhran cohtóo ruhran wanro.<sup>9</sup> Surit ojc chucán yeran wanro. Eyin ectar ájquinan úchtaro. Caballo chiwan to bin tec quejy quinyat ques ajquir éytaro.<sup>10</sup> Eyin rustar caruw rustar éytaro. Rustar cuitar uw tajcro. Ehta tajcyat, rustar cutar tajcyat, yaran sihyór esí rehcaro.

**11** Sisrám chiwa cara surit eyin ácuan cara rehcaro. Sisrám chiwa cara eya ucar unrur cuw báhnajar bi áyquibro. Hebreo cuw cutar cara eya “Abadón,” awúro. Griego cuw cutar “Apolión,” awúro. “Apolión,” wacayat, uw tiwquib ojcor wacaro.  
**12** Récaji ruhwata eyra ruhwú tihr bahjacro. Aha-jira icar bucáy echí ruhwata cab chácayqueyra.

**13** Etar Sir cacum teroy eyat ima rubar cuhjacro. Etya cuhcayat, aját istiyát tevíc rahcro. Oro acar inan ay bi wahníc tan sar bin tevíc rahjacro. **14** Sir cacmá ey quin waquic rahjacro. “Rih caran cuít bi ajca Eufrates cajc cutar uwir cuisa bacáy bin bar tunjáquinro.” wajacro. “Eyin ricua aywi,” wajacro, Sir cacum terwoy bin quin. Etya waquic rahno. **15** Etya wacayat uwir cuisa bacáy eyin quin bar ricuá áyjacro. Eyinat cajc bahná cuitar uwan bitác istiy cuwayta acat sutín acu wajacro. Eyin quin etya waquic éyinan etya sutic cab cuc ocsoteras erar tunir ítchacro. Ahra etya sutín acu bar cab cujacro. Rahs bita cuácat, riy bita cuácat, sihyór bita cuácat, bara bita cuácat etya sutín acu bar cab chájaquinro. **16** Eyinuitar tec quejn ac soldádo in ricán to sécuajacro. Soldádo in caballo icar beyin bin etya sécuajacro. Soldádo in cuisa bítatara aját rahcuít, cuisa doscientos millonesro. **17** Aját cámsiris itit, éytaro. Soldádo in eyinan caballo icar cut beyin yera camís ówro. Yera camís ey ocan buwáy bi cat, tic bi cat, tam bi cat órojoquinro. Caballo ey cuisa cohtóc cuisan wanro. Caballo ey cac sar oca cat iyar cat, azufre cat yehnro. **18** Oc eyuitar cat, iyar eyuitar cat, azufre eyuitar cat uw ruhwujacro. Etya ruhwúruitar uwa bitác

istiy cuwayta acat tíwjacro. <sup>19</sup> Caballo eyat cac cutar cat, rustar cutar cat tiwro. Ey rustar cumoró éytaro. Rustar ey cat cumoró cuisan wanro. Ey cuitar uw ruhwuro. <sup>20</sup> Uwan oca cut, iyar cut, azufre cut sácati éyinat ur ay bár acsar tehmoti yajacro. Sisramin ojcor rusamin ojcor conic etítiro. Oro sirir ojcor, ray sirir ojcor, bronce sirir ojcor, ac sirir ojcor, caruc sirir ojcor conic etítiro. Eyin tamo “Sir queney,” síhwaro. Etya sihwac eyan wácatiro. Sirir éyinan ub bár cuar, cucajá bár cuar, ajc bár cuar, eyin tamo wácati síhwaro. <sup>21</sup> Imarat uw yaujác ques, cuicá yajác ques, isár yajác ques, bes yajác ques cue rehti im eyta acsar yajacro. Urá tehmoti yajacro. Aját ítitan éytaro.

## 10

### *El ángel con el librito*

<sup>1</sup> Etar aját ítitan, Sir cacum caran cuít bi cuacúr abá cutar bin racaro. Eyan bowaram tac icar racaro. Eyan cuisa cuitar tucuar ji racaro. Tucuar eyra Sirat uw obir yajcata ehcuro. Ey acan rahsan wanro. Ey rénaran ocan wanro. <sup>2</sup> Raca rabar carit chi at icar rojocro. Carit conu bi istín acu waajác bi ey at icar rojocro. Cacum ey cajc uch cut wiquir, ques bunach wihár cajc cuitar, ica cuitar sahujacro. Ques rahrhay yacúr cutar rih ey cuitar sahujacro. <sup>3</sup> Etya sahwír eyat ay bár cohwjacro. Cohtóc tenar eyta cohwjacro. Eyat eyta cohwyat acat, icar istán cuitaran cuiran cucuí quejecro. <sup>4</sup> Cuir eyta quej rabar ajc tewic rahcro. Etya tewic rahcuír, aját cuihsún yehnro. Cuihsún yéhnyatra, cuacúr abá cuitar binat as quin wajacro:

—Cuir cucuí bijat chihtá wajáqueya ey cuihsuti jawí. Bahat ehcuti chawí. Tan chinti cuar ehcuti jawí, wajacro.

<sup>5</sup> Etar yacúr cutar cajc cutar ques sahujác cacúm eyat ima atcar cuacúr waar yehwíjacro. <sup>6</sup> Atcar yehwír wajacro:

—Aját uní wacaro. Sirat icúr yajquín séhwactara cab rehti bar yajcáyqueyra. Aját uní wátitara, Sirat as bar cuácataro. Bur cut suw cut etiti itic eyat as cuácataro. Cuacúr abá chajac eyat, cajc uch chajac eyat, yacúr chajac eyat, cuacúruitar itquin chajac eyat, cajc cutar itquin chajac eyat, yacúr sar itquin chajac eyat as cuácataro, aját uní wátitara.

<sup>7</sup> Aját wacaro. Cacúm cucwoy eyat ima rubar cuhcayat, Sirat icúr yajquín séhwactara cab rehti bar yajcáyqueyra. Uwat istiti ey yajcáyqueyra. Uchicrias ima chihtá ehcuquin quin ehcujác ey ahrun ima yajcáyqueyra, wajacro.

<sup>8</sup> Etar bucoy cuacúr binat as quin wajacro:

—Cacúm ey carit ator ey cacay biwi. Yacúr cutar cat, cajc cutar cat cui yehnár itíc ey ator carit ey cacay biwi, wajacro.

<sup>9</sup> Etya wacayat, asan cacúm ey quin bir car, carit ey chíjacro. Etya chícayat, eyat as quin wíjacro. Wiquir wajacro:

—Towi. Carit ey sau cohwi. Ba urá sar cucayat, quiquir rehcáyqueyra. Cuatán cac sar cohcayat, bahsí bahsabas anúb sihca yar eyta rehcáyqueyra, wajacro.

<sup>10</sup> Etya wacayat carit ey cájacro. Cacúm at icar bin cájacro. Caquir cohjocro. Cohr itit, cac sar anúb

sihca yar éytaro. Cuat urá satra quiquitro. <sup>11</sup> Etar as quin wajacro:

—Bahat uw istiy ojcor, uw istiy ojcor, cajc istiy uw ojcor, ajc istiy, ajc istiy teŵquin ojcor, ajc ajquír, ajc ajquír teŵquin ojcor, uw carin cahujín ojcor, bahnác récaji ehcuwi. Eyin bitara rehcátatara récaji ehcuwi. Sir urá cuitar, camur cuitar récaji ehcuwi, wajacro.

## 11

### *Los dos testigos*

<sup>1</sup> Etar as at icar bunár wíjacro. Ubach wahcún ac wíjacro. Etya wiquir, as quin wajacro:

—Bah biwi. Sir ubach wahcwáy biwi. Sir tamo sihwán acu ruwa wahníc yera acar cat wahcwáy biwi. Ey úsara Sir ojcor cónqueyin cat sawuwi. <sup>2</sup> Cuatán Sir ubach watar quer tan sar eyra wahcuti jawí. Wahcuti bahwi. Watar eyra cajc istiy uw acu chájaquinro. Uw éyinat sihyór cuarenta y dos ac Sir pueblo ques cut sau yehwír cat ruhwáyqueyra, -wajacro-. <sup>3</sup> Etya cuácat as chihtá ehcuquin cuias bucáy áyinro. Eyin quin as urán ajcan wiquir áyinro. Uw quin as chihtá ehcwayta acu urá wíquinro. Etya ayat, éyinan uwat ur ay bár yajác ques cue rehquit, oya cuayar bria bár bi ówayqueyra. Etya tas cuar as chihtá ehcwáyqueyra, wajacro, as quin.

<sup>4</sup> Sir chihtá ehcuquin éyinra oliva caruc bucáy bin éyinro. Oca teb bucáy bin éyinro. Oliva caruc cat, oca teb cat Sir acat, cajcan teyan Cara acat chajac éyinro. <sup>5</sup> Chihtá ehcuquin eyin uwat ruhwáy yinyatra eyin cac sar bin oca waáyqueyra. Waar

cuitar ruhwúc eyin tiwáyqueyra. Uwat ehcúc eyin ruhwáy yinyat eyta tiwáyqueyra. <sup>6</sup> Sirat ehcúc eyin quin urá wíjacro. Riwa aytí síwayta acu urá wíjacro. Eycinat Sir chihtá ehcúc tihric ocsó tas riwa aytí síwayta acu urá wíjacro. Rih cat ab arayta acu cat urán ajcan wíjacro. Cajcan teyan bahnác guitar icar bita ruhwú cún'tara, eyta ruhwáyta acu urán ajcan wíjacro. Bitara ruhwú cún'tara, eyta ruhwáyta acu urán ajcan wíjacro.

<sup>7</sup> Eycinat as ojcor ehcúc tihryat, ricumát eyin tiway yehnáyqueyra. Ucar unrur cuw báhnajar sar itic ricum eyat eyin tiway yehnáyqueyra. Tiway yehnár car cuisa bucáy eyin as chihtá ehcuquin bucáy eyin burbar yajcáyqueyra. Eycin tíwayqueyra. <sup>8</sup> Ricumát eyin tiwir car eyin chéina pueblo cumac bi ibit guitar cha báhayqueyra. Pueblo ey ojcor "Sodoman wanro," wacaro. "Egíptoan wanro," wacaro. Pueblo ey intac guitar uw cara récaji caruc ojcor yauwin quejéquinro. <sup>9</sup> Eycin tiwir, chein ibit guitar bahcayat, uw istiyát cat, istiyát cat, ajc ajquír, ajc ajquír téwquinat cat, cajc istiy, cajc istiy binat cat, bahnáquinat chein eyin wahitír cat, buror sisáyqueyra. Chein cat ruhcuín acu ajc waátiro. Riya bay bucoy rahs ur icar tas ruhcua aytí síwayqueyra. <sup>10</sup> Cajca teya bahnác guitar itquin chihtá ehcuquin tiwjac etar ahní rehcáyqueyra. Eytá ahní rehquit fiesta yajcáyqueyra. Rahra rahra icúr bi racar wícayqueyra. Sir chihtá ehcúquinat uw imarat ay bár yajquíc ques bucoy bucoy ruhwujáquinro. Eytá cuácat eyin tiwir ahnian cuit chácayqueyra.

<sup>11</sup> Cajc guitar itquin fiesta yajcáy yinír riya

bay bucoy rahs ur icar rehcáyqueyra. Etat Sir chihtá ehcuquin quin Sirat ima urán ajcan sicor wícayqueyra. Etya wícayat, eyin sicor estají yináyqueyra. Etya yinyat, uw ojc sicáyqueyra. Chein sicor estají yiníc istír roóyqueyra. <sup>12</sup> Chein yinjác ítquinal rahcuáyqueyra. Cuacúr bin ehcuquin eyin cuit cohwić rahcuáyqueyra.

—Cuacúr as quin rowí, cohwić rahcuáyqueyra.

Etya cohwayat quehsí bin ub acat éyinan Sir quin cuwayta acu bowarám tac icar cuacúr beyáyqueyra. <sup>13</sup> Etya becayat acat ihyaran abáy yehnáyqueyra. Etya yehnyat pueblo ubach ucasi bin sicar úbisti, ucasi bin sicar úbisti quehráyqueyra. Uw cat cuisa siete mil bin sácaqueyra. Ihyarat sácaqueyra. Etar cahujín sácati eyin ehorán abayro. Ehúr rehquít Sir tamo cuacúr itquey tamo sihwár, “Bahan ajcan urán tahnacro,” wacáyqueyra.

<sup>14</sup> Ahra icar bucoy bar cab ruhwúc ojcor waquíc tihr bahjacro. Etar áhajira ubar ojcor ruhwata ey bucoy in bar ruhwáyqueyra.

### *La séptima trompeta*

<sup>15</sup> Etar Sir cacúm cucwoy eyat ima rubar ey cuhjacro. Etya cuhcayat cuacúr abá cutar chiwa to binat cohwić rahjacro. Uchta cohwić rahcro:

—Ahra is cara Sirat cat, imat cara yehn áyjaquey cat cajcan teyan bítatara bahnácuitar uw áyayqueyra. Bur cut suw cut eyta áyayqueyra. Cajc cutar itquin bahnáquinat eyin chihtá uní quen rahcuáyqueyra. Bur cut suw cut eyta rahcuáyqueyra, wajacro.

**16** Etya wacayat werjayín cuisa veinticuatro binan Sir acat cuisa bahujacro. Sir acat imár banco guitar ítquinan eyta bahujacro. Sir tamo ay sihwár eyta bahujacro. **17** Etya bahúr wajacro:

Siru, Tetú, bah récaján im eyta, ah cat im eyta tehmótian im éytaro. Bah ajcan urán tahnác rehquít, ahra uw ayin yehnjacro. Bah eyta yehnyat, isan ahniro. Bah ur ayro. **18** Bah tamo síh̄wati binan bah ac túrjacro. Etya cuar bahat eyin sutíc cab, tiwic cab cujacro. Sácajaquin urá wahitic cab cujacro. Bah chiwa acu cat, bah chihtá ehcuquin acu cat, bah uw acu cat, bah tamo síh̄waquin acu cat, bahat eyin acu ay yajquíc cab cujacro. Cárinat cat, cuáyinat cat bah tamo síh̄wayat, eyin ac ay yajquíc cab cujacro. Cuatán ur ay bár binat cajcan teyan ruhwúc etar imár cat tiwic cab cujacro. Bahat eyta yajquíc cab cucayat, isan ahniro, wajacro, werjayinát.

**19** Etya wacayat, cuacúr abá guitar Sir im ubach querat bar waajacro. Etya waacayat ítitan, Sir usar Sir cajón ésatro. Etya waacayat, chihcuát cuasojocro. Ajcyár cat ajcyaran abáy yehnro. Cuir cat quejecro. Ihyár cat abáy yiwojocro. Abarta cat abáy quihujacro.

## 12

### *La mujer y el dragón*

**1** Cuacúr abá guitar récaji istiti bin itchacro. Aját ítitan, wiwá cat ératro. Oyan rahsan wan binan tas cuar erar itro. Wiwá eya sihyór guitar cui yehnár itro. Cuacúr ub doce bi churotán wan oror cuis

otar chájacro. <sup>2</sup> Eyan yir jiro. Etar buwachcuar ubot wiquíc cab cucayat yarat conjacro. <sup>3</sup> Etar aját bucoy wahitchacro. Cuacúr abá cuitar uwan cuánaan istiti bin itchacro. Aját ítitan, ricúm buw binro. Ricúm éyaya cuisa cucuiro. Cuiscar cat ucásiro. Churot cat cucuiro. Eyan cuisan cucú cuitar churotán cucuí chájacro. <sup>4</sup> Eyat rustar cuitar cuacúr ub bitác istiy cuwayta acat cuacúr bin ic ocsó quihú áyjacro. Etar ricúm eya wiw ey cac cahm ítchacro. Wiw ey ecor sah yehníc acor ítchacro. Sah ey ubot waacayat owár imát coh siquin sehwar ítchacro. <sup>5</sup> Etar sera sah yehnjacro. Cajc bahnác cuitar uw áyata ey yehnjacro. Yera tec cuitar uw áyata ey yehnjacro. Etya yehnyat, sah eya ricmát coh aytí Sirat síujacro. Siwir ima quin béjecro. Ima itic cuitar cuwín béjecro. <sup>6</sup> Etar wiw eya ricúm tamar quinjacro. Uw bár cuitar ruhcuay quinjacro. Uw bár cuitar Sirat ey obir yajquín ac récaji bar órojoquinro. Erar riya mil doscientos sesenta ac obir yajquín ac órojoquinro.

<sup>7</sup> Etar cuacúr abá cuitar Sir cacmín cara ajca Miguelat cat Sir cacmín cahujinat cat tec quejy yinjacro. Ricúm jor tec quejecro. Rahra cat ricmát ima ricúm cacmín owár yinír car Miguelin owár tec quejecro. <sup>8</sup> Etya tec quejcayat Miguélinat ricumín burbar yajacro. Burbar yajcayat ricúm cat, ey cacmín cat cuacúr abá cuitar bitách ítajattro. <sup>9</sup> Etar ricúm cara eya cuacúr bin uc áyjacro. Ricúm eyan cumoró récaji im eyro. Ricúm ey ojcor cumoró ey ojcor uwat “Sisram,” awuro. “Satanás,” awuro. Eya cuacúr bin uc ayir, cajc cutar uc áyjacro. Ey owár ima ricúm cacmín cat cajc cutar

te si áyjacro. <sup>10</sup> Eytá si ayat, aját cuacúr erar tewic  
ajc rahjacro. Ráhcuitan, uchta tewjacro:

—Ahra is rabin Sir uw cahm icar tewjquib bar uc  
áyjacro. Eytá Sir quin ricar cat, cheycar cat, eyin  
cahmí icar tewjáquinro. Cuatán ahra cuacúr bin uc  
áyjacro. Eytá cuácayat, is Sirat is bar síujacro. Eya  
ajcan urán cuít biji yehnjacro. Ey cara rehquey  
chájacro. Jesucristo uw ayin yehnjacro. <sup>11</sup> Is ra-  
bin Sir uwat ricum eya burbar yajacro. Obas ab  
bijác etar, chinjác etar ey burbar yajacro. Rabin  
eyin tíwata tacat, imár tíwata tamo síhwati cuar,  
Sir chihtá ehcujacro. Eytá ehcúr guitar éyinat  
ricum ey burbar yajacro, -wajacro, as cucáj acat-  
. <sup>12</sup> Eytá cuácayat, cuacúr abá guitar itquin ahní  
rehcátaró. Cuatán cajc cutar itquin cat, yacúr sar  
itquin cat, cue rehcáyqueyra. Sisram cajc cutar  
uc ayat, túrjacro. Abáy túrjacro. Birá rehti ima  
bar cuécwata sehwár car, abáy túrjacro, waquíc  
rahjacro.

<sup>13</sup> Ricum ey cuacúr bin cajc cutar uc ayat, eyat  
wiw eya ques cut quehwú béjecro. Sera sah ab  
ques cut quehwú béjecro. <sup>14</sup> Ricmát eyta quehwú  
becayat cahm ruhcuay quinayta acu wiwá quin  
ectar wíjacro. Uw bár guitar ruhcuay beyta acu  
ectar wíjacro. Wiquir uw bár guitar bara bay bacoy  
eyra ubut quit itin acu áyjacro. Erar caban eyta  
obir yajquín acu áyjacro. <sup>15</sup> Wiw eya eyta quinyat  
questoc ricmát ima cac sar bin rih ahjacro. Rih  
cumac bi yehnín acu eyta ahjacro. Rihat wiw ey  
chiwín acu ahjacro. <sup>16</sup> Ricmát rih eyta ahjác cuar,  
cajcat icat wiw ey síujacro. Cajcat icat ima cajc  
querat waajacro. Waar guitar rih bahnáć ey icar

bijacro. Ricmát ima cac sar bin rih uhcajác ey bahnác sehnó bijacro. <sup>17-18</sup> Eytá bicayat, ricum abáy túrjacro. Wiw ey ac abáy túrjacro. Eytá turir wiw ey bomcarín owár tec quejy bijacro. Sir chihtá yajquin owár tec quejy bijacro. Jesucristo chihtá ehcuquin owár tec quejy bijacro. Bir car yacúr cajc cut umítuitar ítchacro.

## 13

### *Los dos monstruos*

<sup>1</sup> Ricum ey yacúr cajc cutar ityat, aját ítitán, yacúr sar bin ricum istiy cat yehnro. Ricum yacúr sar bin yéhnyeyan cuiscar ucásiro. Cuisa cat cucuiro. Cuiscaruitar churotán ucásiro. Ey cuisauitar ajcan ahsín bi cuihsujacro. <sup>2</sup> Ricum ey cohtocuan wanro. Ey quesan banab quesan wanro. Ey cacan cohtóc cacan wanro. Yacúr ricum yehnjaquey quin cuacúr bin uc ayjac eyat ima cámaran wíjacro. Uw ayin acu ima cara bancouitar chihr áyjacro. Ricá to bin ayin wajacro. <sup>3</sup> Yacúr ricum ey cuijistiy eyra bahnác tajc téjecan wanro. Eytá tajc téjecan wan cuar, sicor tan jájacro. Etar ricum ey chihtán uw bahnáquinat rahjacro. Eyat yajquey istír ub yehwíjacro. Ub yehwír car, ey chihtá rahjacro. <sup>4</sup> Ricum cuacúr bin uc ayjac eyan uwat ajcá ji béjetro. Eyan Sir sihwár, ajcá ji béjetro. Yacúr sar bin ricum yehnjaquey quin camur wijac etar eyan ajcá ji béjetro. Yacúr sar bin yehnjaquey tamo cat Sir sihwár, ey cat ajcá ji béjetro. Etar uwat wácuano:

—Yacúr sar bin yehnjaquey bahnaquin cuitatto. Istiy ey owari batro. Ey chihtá yájtira yájcajatro. Ey jotra tec quéjcajatro, wácuano.

<sup>5</sup> Yacúr ricumát Sir ojcor ajcan ahsín tewjacro. Cuatán ima im ojcor “asan Sitro,” wajacro. Eyat eyta tewín acu ajc waajacro. Uw ayin acu cat ajc waajacro. Sihyór cuarenta y dos tas uw ayin acu ajc waajacro. <sup>6</sup> Eytá ajc waacayat, eyat Sir queney ojcor cat, Sir ajc ojcor cat, Sir ubach ojcor cat, Sir owár cuacúr itquin ojcor cat, ahsín tewjacro. <sup>7</sup> Eytá Sir uw owár tec quejn acu ajc waajacro. Eytá eyin burbar yajquín acu ajc waajacro. Eytá uw bahnaquin, birar urar, ajc ajquír, ajc ajquír tewjquin, uw istiy, uw istiy, bahnaquin ayin acu ajc waajacro. <sup>8</sup> Etar cajcan teyanuitar itquin bahnáquinat ey tamo Sir sihwár car, ajcá ji beyáyqueyra. Biyin ajca Sir carit cuitar cuihsútitara, récaram cabar cuanti jat echí cuihsútitara, éyinat ricum eyan ajcá ji beyáyqueyra. Carit ey cuitar bíyinan Sir owár cuacúr ítatatará ehcujacro. Eytá ehcún ac Obas chinjáqueyat récaji cuihsú bahjáquinro. <sup>9</sup> Biyin cucáj chétara rahcwí. <sup>10</sup> Biyin cajc istiy ahár si beyin wajáctara, eyin cajc istiy ahár si beyáyqueyra. Biyin espada cuit tiwin wajáctara, eyin espada cuit tíwayqueyra. Eytá waquir cuitar Sir uwat Sir chihtá wácati tan úcayta acu ehcuro.

<sup>11</sup> Eytá istir car ricum istiy cat itchacro. Ricum eya cajc tan sar bin, ica tan sar bin yehnjacro. Ricum eya cuiscara bucayro. Obas cuiscar éytaro. Ey tevíc ey cat ajcyaran abayro. Yacúr ricmát tewjí eyta tewjacro. <sup>12</sup> Eytá uw bahnaquin áyjacro. Yacúr ricmát uw ayir eyta, eyat cat eyta áyjacro. Eytá yacúr ricum ecsar chaquir car eyta áyjacro. Cajcan teyan bahná cuitar itquin quin yacúr ricum ojcor “uya sitro,” tewjí áyjacro. Yacúr ricum

bahnác tajác cuar, sicor tan jajac ey ojcor eyta tew̄ áyjacro. <sup>13</sup> Eyat uwat récaji istiti bin yajcaro. Cámurán cuít bi guitar eyta yajcaro. Uw ub acat cuacúr abá sar bin ocan ica guitar tijca ayro. <sup>14</sup> Yacúr ricum écsara chaquir car, récaji istiti bin yajquír guitar uw cayar yajcaro. Cajc cutar itquin cayar yajcaro. Cayar yajquír car uw quin yacúr ricumán wan oron wajacro. Ricum eya espada guitar chinata acat tajacro. Etya tajác cuar, chinti rehjecro. Ricum eyan wan oron wacaro. <sup>15</sup> Yacúr ricumán wan eyta óroyat, ica tan sar bin yehnjác eyat órojoc ey icar camur chájacro. Orojoc eya camur siin acu cat, uchta tewín acu cat camur chájacro. Uwat tewír eyta tew̄ayta acu ajc wijacro. Etya ajc wiquir car, ricmán wan órojoc ey ajcá ji beti eyin tiwin wajacro. <sup>16</sup> Ricum ica tan sar bi yehnjác eyat uw bahnaquin átcara guitaran, ubcar guitaran ima ajc cuihsún wajacro. Bahnaquin guitar, oyin guitar, chiwa guitar, rayin guitar, cuayin guitar, patronin guitar, cacmín guitar, eyta cuihsún wajacro. <sup>17</sup> Bíyinat imár icar eyta cuihsú áytieyra, ricum ajcan número ubcar guitar, atcar guitar cuihsú áytieyra icuran biyan rájatro. Wahquí cat bitách wáhjatro. <sup>18</sup> Uch chihtá orac rahcuín acu urá ji chácataro. Bíyinan urá ji, bow ji rehcáyatan, ricum número ajc ey sawátaro. Número eya uw númerocuano. Ey sawúr ítitan, seiscientos sesenta y seiscuano.

## 14

*El canto de los 144,000*

<sup>1</sup> Etar aját bucoy wahitchacro. Aját ítitan, Sir Obas Sión terá cuitattro. Obas ey owár cat uwa cuisa ciento cuarenta y cuatro milro. Uw eyin ubcaruitar Obas ajc cuihsujáquinro. Obas Tet ajc cat cuihsujáquinro. <sup>2</sup> Etar istír, cuacúr abá cuitar ajc tewic rahjacro. Ajc tewic ráhcuitan, rih tucur ajcyár éytaro. Cuir quer ajcyár éytaro. Ajc tewic rahcuít, uw to binat arpa cow̄ cow̄ ter ajc éytaro. <sup>3</sup> Uw éyinat cara banco acat tajacro. Carat cat, estají bin cuisa bacáy binat cat, werjayinát cat rahcuayta acu tajacro. Anto tati bin tajacro. Cuisa ciento cuarenta y cuatro mil binat éyinata tajacro. Cahujínatra ey taajar binro. Cuisa ciento cuarenta y cuatro mil bin cajc uch cuitar bin síujac etar eyta tajacro. <sup>4</sup> Eycinat isár yajti binro. Eycin orac binro. Eycin Obas questoc birar birar becaro. Eycin uw sicar bin récaram síujaquinro. Sir imáy chaquin acu, Obas imáy chaquin acu síujaquinro. <sup>5</sup> Eycinat sucuar sinti binro. Sir tayar batro. Etar éyinat tajacro.

### *Los mensajes de los tres ángeles*

<sup>6</sup> Etar aját Sir cacúm cuacracat raquíc itchacro. Cajcan teyan bahnác cuitar itquin quin ehcún acu chihtá rojocro. Chihtá uwan cuánaan tehmoti bi rojocro. Uw istiy quin, istiy quin, cuw istiy tewquin quin, cajc istiyín quin, bahnaquin quin ehcún acu rajacro. <sup>7</sup> Eytar raca rabar cohwjacro:

—Sir cahmor ayú rehwí. Ey ojcor “Uya ayan tahnacro,” wawí. Uwat Sir tayar yajác ques cuecuc cab bar cujacro. Eytar chihtara ey tamo ay síhwawi. Ey cucajá acat ay tawi. Eyat cuacúr abán, cajcan, teyan, yacuran, riyan, icuran biyan

bahnác cuanjacro. Etar eyat rahcuayta acu tawi, wajacro.

<sup>8</sup> Etar cacúm istiy cat ey questoc rajacro. Eyat cat raca rabar cohwjacro:

—Babilonia puébloan caran cuít cuar, bar bahnjacro. Ey cutar itquin cat bar sácajaco. Babilonia carin chihtá cutar uw bahnáquinat isár yajacro. Sirir órojoquin tamo síhwajacro. Etya yajquícuitar Sir tec chíjacro. Tayar yajquícuitar tec chíjacro, wajacro.

<sup>9</sup> Etar cacúm istiy bawoy cat questoc rajacro. Ey cat raca rabar cohwjacro:

—Bíyinat yacúr ricúm tamoa eyan Sir síhwayat, bíyinat ey ojcor conyat, bíyinat ricumán wan órojoc ey ojcor conyat, Sirat eyin cuécwayqueyra. Bíyinat imár ubcaruitar atcaruitar, ricúm ajca cuihsawayat, <sup>10</sup> Sirat eyin cuécwayqueyra. UW ey wácati cuécwayqueyra. Sirat ima cacmín ubot cat, Obas ubot cat, uw eyan ocauitar cat, azufreuitar cat ruhwáyqueyra. <sup>11</sup> Etya ruhwúc oc íyaran uwan cuánaan im eyta etiti cuacúr býqueyra. Yacúr ricúm ojcor, eyan wan órojoc ey ojcor conic ques im ubcaruitar, atcaruitar ricúm ajca cuihsú ayic ques etiti cuécwayqueyra. Etya cuécwayat bitách tan chácajatro, wajacro. Cacmát eyta wajacro.

<sup>12</sup> Etya ehcúruitar Sir uwat tan ucayta acu wacaro. Sir chihtá yajquéyinat wácati chácayta acu wacaro.

<sup>13</sup> Etar cuacúr abáuitar binat as quin wajacro:

—Uchta cuihsuwi. Sácajaquin ohbac chácayqueyra. Sir tamo síhwaquin sácatayan, eyin ohbac rehcáyqueyra. Sir Ajcan Cámaran Eyt cat

wacaro: “Ohbacan cuít it chácayqueyra. Sir canar ruóc tihrí tan jácayqueyra. Eycinat ur ay yajác etar Sirat tan chinti ay obir yajcáyqueyra,” wacaro.

*La cosecha de la tierra*

<sup>14</sup> Etar aját wahitchacro. Bowarám cuas bi itchacro. Bowarám ey arcutar uwir bin itic itchacro. Uwir bin ey cuísofar oro churot chero. Ey ator bachít ruhr ehchí bi yehwro. <sup>15</sup> Etar Sir cacúm istiy Sir usi bin watar waajacro. Waar car bowarám arcutar itic ey cuit ay bár cohwjacro.

—Ahra rijác ey bar tam rehjecro. Bar secuac cab cujacro. Etya chihtara bachítuitar ehsuwi. Bahnác sécuawi, wajacro.

<sup>16</sup> Etya wacayat bowarám arcutar eyat ima bachít cajc bahnácuitar bahcojocro. Etya bahcóruitar cajc bahnác cutar bin tihrjác ey, tam rehjéc ey, bahnác sécuajacro.

<sup>17</sup> Etar Sir cacúm istiy cat cuacúr bin Sir usi bin watar waajacro. Eyat cat ator bachít ruhra ehchí bi yehwro. <sup>18</sup> Etar Sir cacúm istiy cat watar waajacro. Yera acaruitar bin waajacro. Cacúm eya oca cayá chájaquinro. Eyat cacúm bachít chi ey cuit cohwjacro:

—Ahra chistár ub bar tam rehjecro. Etya chihtara bachítuitar ehsuwi. Cajc bahnácuitar chistár uba awat istánuitar sécuawi, wajacro.

<sup>19</sup> Etya wacayat cacúm eyat cajc bahnác cutar bachít ey bahcojocro. Bahcóruitar chistár ub ehsujacro. Etya ehsúr awat istanácuitar sécuajacro. Rihar cuhmóc awatuitar sécuajacro. “Uba rihar cuhmóc awat,” wacayat, ey cuhmóc awat ojcor wátiro. Sirat ima tayar yajác ques

cuecuc ojcor wacaro. Chistár ub secuar eyta uw cat eyta sécuayqueyra. Ub rihar cuhmór eyta, uw cuecuruitar cat uw ab cat eyta waáyqueyra. **20** Etya sécuayat, chistár ub rihar cuhmón acu quesar cut sahujacro. Pueblo watar cuhmojocro. Etya cuhmoyat uw ab waajacro. Cuhmóc awat cuitar bin ab waajacro. Ab eya únsoran metro y mediocuano. Ab bijacan enara trescientos kilómetrocuano.

## 15

### *Los ángeles con las siete últimas plagas*

**1** Etar aját cuacúr abá cuitar anto istiti bin bucoy istiy itchacro. Etya istír as ub yehwjacro. Aját itchác ey tan chíntiro. Uchta bin itchacro. Aját Sir cacmín cuisa cucuí bin itchacro. Sir cacmín éyinan uwán icar cucuí cuecun acu yiníc itchacro. Ubar ojcor cuecun acu yiníc itchacro.

**2** Aját récaji uchta itchacro. Awat yacuran wan itchacro. Awat ey ehchí sicuacro. Awat eyan ocan wanro. Awat ey intac Sir uw catro. Sir uw éyinat yacúr ricúm cat, eyan wan órojoquin cat, ey ajca número cat burbar yajacro. Etya burbar yajác etar awat ey intacro. Eyn ator Sir arpa cow̄ cow̄ ten acu yehwro. **3** Sir uw éyinat Obas tamo sihwār tajacro. Récaji Moisés Sir chihtá ehcúquibat tar eyta, éyinat cat eyta tajacro. Eynat ta rabar wajacro:

Siru, caru, bah cámaran bahnaquin cuitatro. Bahat chihtá tahnác yajcaro. Bahat eyta yajcayat is ub yehwro. Bahat uw cayar yájtiro. Urá istán cuitar bahnác yajcaro. Baha uw

bahnaquin cáraro. Uw bahnaquin reyro.

<sup>4</sup> Bah cahm bahnaquin ayú rehcaro. Bah ojcor ay wacaro. Caru, bah istir binan ur ayan orac rehcaro. Bahra ajquitro. Bah urá istanacro. Etya chihtara, cajc bahnácuitar bin cuw ajquír téwquinat, cuw ajquír téwquinat bah tamo síhwáyqueyra. Bah ojcor conáyqueyra, wajacro, ta rabar.

<sup>5</sup> Etya tacayat, aját wahitchacro. Cuacúr abáuitar Sir usi Sir im wiquíc querat waajacro. <sup>6</sup> Sir querat etya waacayat, Sir cacmín cucuí bin watar waajacro. Eycinat uwan icar cucuí cuecun acu waajacro. Sir cacúm eyin oya lino quen bi ówro. Oya cuasá cuasan ehchí bi ówro. Ur acat oro ahntará questajacro. <sup>7</sup> Etar estají bin sicar bin istiyát cacúm eyin at icar oro soya cucuí wíjacro. Soy ey icar icúr bi chájacro, Sirat uw cuecun acu. Siran bur cut suw cut im etya etiti rehcaro. <sup>8</sup> Soy icar etya chácayat, Sir usar bin iyar yehnjacro. Iyar yehnár, íyaran úbachan cuinjacro. Sir caran cuít rehquít, urán ajca cuít rehquít iyar ey yehnjacro. Etya chihtara uwan Sir usi bitách raúwajatro. Sir cacmín cucuí binat uwan icar cucuí cuecuc tihric ocsó tas raúwajatro.

## 16

### *Las copas de castigo*

<sup>1</sup> Etar cuacúr Sir usi bin ajc tevíc aját rahjacro. Sir cacmín cucuí eyin quin tevíc ajc aját rahjacro. Eycin quin wajacro:

—Ba soya sar uw cuecun acu chajac eya úhcawi. Cajca teya guitar úhcawi. Etya uhcayat Sirat uw cuécwawayqueyra, wajacro.

<sup>2</sup> Etya wacayat, Sir cacúm récaji eyat ima soya sar ey cajc cutar uhcajacro. Etya uhcayat biyin ubcar guitar yacúr ricúm ajca cuihsujáctara, bíyinatan yacúr ricúm tamo síhwajactara, eyin ojca bahnác cutar cuhsír yinjacro. Ojc cat bahnác sejecro. Cuhsír eyan yaran abayro.

<sup>3</sup> Etar Sir cacúm bucoy eyat ima soya sar ey yacúr icar uhcajacro. Etya uhcayat yacuran ab arjacro. Yacúr rih chein aban wan arjacro. Etya aryat yacúr icar itquey bahnác sácajacro.

<sup>4</sup> Etar Sir cacúm bawoy eyat ima soya sar ey rih icar cat, bencach rih icar cat uhcajacro. Etya uhcayat rih cat, rih bencach cat ab arjacro. <sup>5</sup> Aryat, Sir cacúm rih cayibat waquíc ey aját rahjacro. Eyat Sir quin wajacro:

—Siru, ba récaji binro. Ah cat im eyta rehcaro. Bah ur ayro. Bah ajquitro. Bahat cuécwata bin cuécujacro. Ruhwata bin ruhwujacro. <sup>6</sup> Uw éyinat bah chiwa tíwjacro. Etya yajác ques bahat rihan abir arír car, éyinat yahn acu wíjacro. Eyiñat tayar yajác ques bahat eyin yarís cuécujacro, wajacro.

<sup>7</sup> Etya wacayat yera acar guitar bin ajc tewic rahjacro. Uchta waquíc rahjacro:

—Eytaro. Caru, Siru, Bah cámaran bahnaquin cuitattro. Bahat uw cayar yájtiro. Ba yarsa sihwár cuécuro. Ur istanác guitar uw cuécuro, wajacro.

<sup>8</sup> Etar cacúm bacoy eyat ima soya sar ey rahs guitar uhcajacro. Etya uhcayat rahsat uw abáy wahnjacro. Quicrát uw abáy wahnjacro. <sup>9</sup> Etya

wahníc tacat, uwat ur ay bár yajquey etítiro. Sir ojcor ayra téwtiro. Cuatán acsar Sir ojcor ajc ahsín tewjacro. Sirat eyin cuécujac ques ahsín tewjacro.

**10** Etar Sir cacúm eswoy eyat ima soya sar ey yacúr ricúm bancouitar uhcajacro. Eytá uhcayat ricúm eya birar birar cara chájactara, erar bahnác cheycar eyta tínjacro. Eytá tinyat uwan yaran abáy rehjecro. Yaran abáy etar uwat imár cuwan ruhr cut cohjocro. **11** Eytá coh rabar Sir ojcor ajc ahsín tewjacro. Yaran abáy cuácayat, cuhsirán abáy cuácayat Sir ojcor ajc ahsín tewjacro. Ur ay bár yajquey etiti cuar eyta tewjacro.

**12** Etar Sir cacúm teroy eyat ima soya sar ey rih ajca Eufrates icar uhcajacro. Eytá uhcayat Eufrates rih bar injacro. Rahs raquíc wihár bin carin reyin rahray waayta acu injacro. Eytá raquíc tunti acu eyta injacro. **13** Etar aját wahitchacro. Aját ítitan, ricúm buw bi cac sar bin cat, yacúr ricúm ey cac sar bin cat, Sir chihtá ehcúquinir cac sar bin cat, ricúm sasá ahsín bin yinro. Istiy cac sar bin úbisti, istiy cac sar bin úbisti yinjacro. Ricúm sasá eyin quehrocuan wanro. **14** Quehrocuan wan bin éyinat uwat récaji istiti bi bucoy bucoy yajacro. Eytá cajc istiy cuitar reyin carin secuay béjecro. Cabar tinic cab cuquíc cahmor secuay béjecro. Réyinat cárinat tec quejta acu sécuajacro. Sir imát ajcan urán cuít bi cuitar cabar tin ayat owár, eyin tec quejta acu sécuajacro. **15** Eytá yajcayat, Jesusat wajaquey tan chinti síhwawi. Eytá eyta ojcor wacaro: “Eytá tinic cab cuácayat, as istiti wiquinro. Besin uwat istiti wiquir eyta as cat eyta wiquinro. Biyin as wiquí acor uror ítictara,

ahní rehcáyqueyra. As wiquíc acor oya cuas bítas cuar ítictara, ahní rehcáyqueyra. Etya chihtara éyinan siati rehti oya ji asi jor beyáyqueyra. Ayú bár beyáyqueyra,” wacaro. <sup>16</sup> Etar quehrocuan wan binat reyin carin sécuayat, éyinan cajc ajca Armagedónuitar sécuajacro. Hebreo cuw cutar cajc eyan eyta awuro.

<sup>17</sup> Etar Sir cacum cucwoy eyat ima soya sar ey cajcuitar cuacracat uhcajacro. Etya uhcayat, cara bancouitar itic eyat Sir usi cuar ay bár cohwjacro.

—Ahra bar cab cujacro, wajacro.

<sup>18</sup> Etya cohwyat owár chihcuát cuasojocro. Ajcyár cat ajcyaran abáy yehnro. Cuir cat quejecro. Ihýár cat abáy yehnro. Cabar cuanicuitar eyta yehnti bi yehnjacro. Ihýár yehnjác eyan áyaran bahnác cuitattro. <sup>19</sup> Ihýár ey yehnyat, pueblo cumac tuwjacan awat bayuitar rachacro. Cajc istiy uw pueblo cat, cajc istiy uw pueblo cat, cajc istiy uw pueblo cat ubach bahnác quihu-jacro. Sirat Babilonia pueblo uwat tayar yajác Sirat tan chinti sehwar car eyin cuécujacro. Eyin abáy ruhwujacro. <sup>20</sup> Ihýár eyta yehnyat, yacúr ubut cajc bahnác bahnjacro. Rirar cat bahnjacro. <sup>21</sup> Cuacúr abáuitar bin cat ábarta uwuitar tijcajaxro. Abaritan roba bacáy binan uwuitar tijcajaxro. Abartuitar uw ruhwuyat, uwat Sir ojcor ahsín tewjacro. Sirat eyta to cuécujac etar ahsín tewjacro.

## 17

*Condenación de la gran prostituta*

<sup>1</sup> Etar cacúm cucuí bin sicar úbistiyat as quin wajacro. Oro soya ji bin sicar úbistiyat as quin wajacro:

—Asi jor biwi. Aját ba quin ehcunro. Isarib eyat tayar yajác ques cuécwata ey ojcor ehcunro. Wiw eyan rih cumac bin cajc sar itro. <sup>2</sup> Wiw ey jor cajc istiy cárinat, réyinat isár yajacro. Ehta isár yajcayat cajca bahnácuitar uwat ay síh̄wati cuat ey jor túrarir yajacro. Simat turir beyar eyta isarat uw eyin cat éytaan wan béjecro, wajacro.

<sup>3</sup> Ehta waquir car, cacúm eyat cámsirisuitar as béjecro. Uw báruitar béjecro. Erar cur ítitan, wiwá ératro. Wiw eya ricum buw bi icaruitar waarr car itro. Ricum eya ojcum bahnácuitar Sir ojcor ajca ahsín tevíc ey cay cuihsujacro. Ajc ahsín cuihsujacan sasasro. Ricum eyan ojc istanác cuaquir cuisan cucuiro. Cuiscar cat ucásiro. <sup>4</sup> Wiw eya oya buw bi cat, tic bi cat owro. Oro rayan, ac rayan, perla ray owro. Ey at icar oro soya yehwro. Oro soya sar restán abayro. Isár yajác tayar restán ey satro. <sup>5</sup> Ey ubcaruitar chihtá uwat sinti bi cuihsujacro. Uch cuihsujacro. “Asan Babilonia cúmacro. Wiwá isarib ey bahnaquin bin acu abró. As chihtáuitar uwat sirir ojcor conro,” wajacro. <sup>6</sup> Etar aját wiw ey ítitan, simat beyar eyta béjecro. Sir uw acsar yauwa rácarat béjecro. Eyin ab ita rácarat béjecro. Jesús chihtá ehcuquin bucoy bucoy tiwa rácarat béjecro. Simat beyar eyta béjecro. Aját eyta istír car as ub yehwjacro.

<sup>7</sup> Ehta cuácat Sir cacúm eyat as quin wajacro:  
—Chihtá istítira yajti jawi. Chihtá ey aját bah quin it áyinro.

Wiŵ ey ojcor, ricúm ey ojcor icúr chihtá ehcutar aját bah quin it áyinro. Ricúm cuisa cucuí bin ey, cuiscar ucasi bin ey, ricumát wiŵ ey yehwíc ey chihtá cat ehcunro, -wajacro. <sup>8</sup> Ricúm bahat itchác eyan cahmor estají rehjéquinro. Cahmor estají rehjéc cuar, ah cutar esta batro. Etya cuar ítchareht sícowar estají yehnáyqueyra. Ucar unrur cu báhnajar bin sicar bin estají yehnáyqueyra. Etya estají yehnár cat sicor bár chácayqueyra. Ricúm ey estají yehnyat, uwa ojc sicáyqueyra. Ub yehwáyqueyra. Cajc anto cuanti jat echí Sir carit cuitar ajc cuihsuti eyin ojc sicáyqueyra. UW éyinat ítitan, ricúm eya yarir car sicor estají yehnro. Etya istír ojc sicáyqueyra. Ub yehwáyqueyra.

<sup>9</sup> 'Chihtá ey istín acu bowán urán cuít bi tayloro. Cuisa cucuí eyan terá cucuiro. Ey terá cuitar wiŵ ey itro. <sup>10</sup> Cuisa cucuí eyan reyin cuisa cucuí binro. Reyin eyin esí binra bar sácajacro. Istiy ah cutar itro. Istiyrá anto yéhntiro. Etya cuar awan yehnár car biráy bár rehcátaro. <sup>11</sup> Ricúm cahmor bi estají cuaquir, ahra chinjác eyan rey cuisa abwoy eyan eyro. Reyin carin cuisa cucuí bin owár binro. Eya sicor bar sutata binro, wajacro, Sir cacúm eyat as quin.

<sup>12</sup> 'Cuiscar ucasi itchác eyan reyin carin éyinan cuisa ucásiro. Reyin carin eyin áhajira uw ayin acu yíntiro. Cuatán éyinat uw ayin acu ricúm owár inic yináyqueyra. <sup>13</sup> Carin eyin bahnáquinat ricúm urá sehwar eyta síhwaro. Imarat uw ayin yinjác cuar, éyinat ricúm quin uw ayin wac báhayqueyra. <sup>14</sup> Carin éyinat Obas Jesucristo owár tec quéjueyra. Etya tec quejcayat, Obasat eyin

burbar yajcáyqueyra. Obas eya carin acu cáraro. Reyn acu reyro. Etya rehquít eyat reyin eyin burbar yajcáyqueyra. Obas chiwa Obas imát chiír cájaquinro. Cácat yéyinat ey chihtá wácati yajacro, wajacro. Sir cacmát as quino eyta wajacro.

<sup>15</sup> Acsar cat as quin wajacro:

—Bahat ítitan, rih arcútaran wiw ey itro. Rih eya uchro. Rih eya wacayat uw ojcor ehcuro. Uwan ricán to eyro. Cajc istiy, cajc istiy uw ojcor ehcuro. Cuw istiy tew̄quin ojcor, cuw istiy tew̄quin ojcor ehcuro. <sup>16</sup> Cuiscar bahat itchác eyan carin ojcor ehcuro, -wajacro, as quino-. Carin éyinat cat, ricmát cat wiwá isarib ey quehswáyqueyra. Quehsú rehquít, éyinat ruhwáyqueyra. Cuayin chácayqueyra. Siasi chácayqueyra. Ey sura bahnáć cóhyqueyra. Oca cut wahnáyqueyra. <sup>17</sup> Sirat eyin ur icar chihtá chájacro. Eyiñat ey ruhwá racar rehquín acu, eyta wahnín sihwan acu, Sirat eyin ur icar chihtá chájacro. Sirat ima chihtá yajca racar isó áyjacro. Sirat eyin ur icar chihtá chaquir, eyin bahnáquinat ur istán síh̄wajacro. Ur istán síh̄wayat cat, ricum quin uw ayin wacáyqueyra. Sir imát chihtá wac bahjác bahnáć caba rehc ocsa tas eyta ayin wacáyqueyra. <sup>18</sup> Wiwá bahat itchác ey wacayat wiwá ojcor ehcútiro. Pueblo caran cumac ey ojcor ehcuro. Cajcan teyan bahnáć cutar reyin carin áyqueyan eyro, wajacro, Sir cacmát as quino.

## 18

### *La caída de Babilonia*

<sup>1</sup> Etar Sir cacum istiy cuacúr bin rajacro. Etya racayat aját itchacro. Cacum eya uw ayin ajcan

urán chero. Ey cajc cutar wicayat, bahnác wanquír ehchí cuanjacro. Ey churot wan beo beo rehquít cuanjacro. <sup>2</sup> Eyat bahnáquinat rahcuayta acu cohwjacro:

—Babilonia pueblo bahnác sutchacro. Babilonia pueblouitar itquin bahnác sácajacro. Pueblo ey caran cumac rehjéc cuar, ahra cuiquín cat, cherbarin cat, rusamin cat ey guitar itay yinjacro. Ricúm ay bár bin erar quiujacro. Ricúm éctara ji bin, ay bár bin erar quiujacro. <sup>3</sup> Cajc istiy uwat cat, cajc istiy uwat cat pueblo ey guitar isár yajquín acu békhequinro. Uwa simat turir beyar eyta isarat uwa eyin cat éytaan wan béjecro. Cajc bahnác guitar bin réyinat cárinat pueblo ey guitar isár yajáquinro. Ey pueblo uwat oyan cuít wahr car, rayan cuít síhwati ahujáquinro. Etya ahuyat cajc bahnác guitar ajc bahnác icúr bi ráquinat rayan cuít sécuajaquinro. Etya yajác ques bahnác bar sutchacro, wajacro.

<sup>4</sup> Etya wacayat istiyát cuacúr abá guitar binat wajacro:

—As uwu, ba pueblo ey guitar bin waa béowi. Etya waátieyra, pueblo ey guitar ítquinat Sir tayar yajquíc sinir eyta, baat cat eyta yajquíc sínata óraro. Etya waátieyra pueblo ey guitar itquin cuécwata eyta, ba cat eyta cuécwataro. <sup>5</sup> Eynat bucoy bucoy Sir táyaran to yajacro. Eynat Sir tayar yajác tamо Sirat tan chinti séhwaro, wajacro.

<sup>6</sup> Etar cuacúr cacmín quin acsar wajacro:

—Pueblo ey guitar ítquinat tayar yajác ques cuécuwi. Imarat cahujín ruhwúr eyta, rahra cat im eyta ruhwúwi. Rahra wan cuít ruhwúwi. Ey cárinat cahujín ruhwújác eyta, sicor carin eyin

cat rahra wan cuít ruhwuwi. <sup>7</sup> Pueblo ey cárinat imár ojcor ay tewjacro. Etya tewá rabar síh̄wati isár yajcaro. Etya chíhtara éyinat im ojcor bita tewjáctara im etya cuécuwi. Pueblo ey cárinat ima pueblo ojcor wacaro: “Pueblo uchan bahnác cuitattro. Pueblo uchan cuaca báreyra. Cue rehca báreyra,” wacaro. <sup>8</sup> Etya cuácayat, riy istanácuitar bahnác cuácayqueyra. Istiti cuar in bar cuácayqueyra. Riy istanácuitar restát uwa to bin sáçayqueyra. Uwat sácajaquin racar conáyqueyra. Uw cat yayat cuácayqueyra. Pueblo ey cat oca cut wahnáyqueyra. Sir ima ajcan urán cuít eyat ey cuécwayqueyra, wajacro.

<sup>9</sup> Etya ruhwuyat cajc bahnácuitar cárinat istáyqueyra. Eyuitar isár síh̄wati yajáquinat istáyqueyra. Pueblo ey wahníc iyar istáyqueyra. Cajc istiy cuar istáyqueyra. Etya istír pueblo ey racar cue rehcáyqueyra. Ey racar óyqueyra. <sup>10</sup> Eyiñat ey pueblo ruhwú tamo cajc istiy cut cuar istáyqueyra. Etya istá rabar wacáyqueyra:

—Babilóninu, Babilóninu, Sirat ba cuécwayat isan cuero. Ba cab rehti sutchacro, wacáyqueyra.

<sup>11</sup> Cajc bahnácuitar oya raquin cat ey racar cue rehcáyqueyra. Ey racar óyqueyra. Imár quin rehratí oya wahjar rehquít, cue rehcáyqueyra. <sup>12</sup> Récaji Babilonia uw quin ajc bahnác rájaquinro. Uw ey quin oro cat, plata cat, ac ray cat, perla ray cat rájaquinro. Lino oya cat, oya tic bi cat, seda oya cat, oya buw bi cat rájaquinro. Caruc inan ay bi cat, marfiluitar órojoc bi cat, caruc ay bi cat, yera cat, bronce yera cat, aca rih sijác bi cat, <sup>13</sup> canela cat, cuiis anará perfume cat, wahnín acu inan ay

bi cat, mirra cat, perfume cat, vino cat, aceite cat, harina cat, trigo cat, at ruwa cat, obas cat, caballo cat, caballo carro cat rájaquinro. Uw cacmín cat ruwa rar eyta rájaquinro. Récaji rajac cuquir, ahra rehrín quínoi rájatro. Eyta cuácatue rehcáyqueyra. <sup>14</sup>Eyta rajar rehquít wacáyqueyra:

—Baat récaji caruc ub ahní yajac cuar, ahra bi yáyajatro. Bar bahnjacro. Ira timá ji bi bar bahnjacro. Behmaray icuran biyan óriquen bi bar bahnjacro. Ba at icar icrí tányoti bahnác chajac cuar, ahra bar bahnjacro. Bucoy istá báreyra, wajacro.

<sup>15</sup>Uwat oy ey rar guitar, rayan cuit sécuajacro. Oya ey ráquinan Babilonin ruhwúc cahm ayot birá cuít ítayqueyra. Eyta ita rabar cue rehcáyqueyra. Oyqueyra. Ey racar cue rehquír car wacáyqueyra:

<sup>16</sup>—Babilóninu, Babilóninu, ba conú cuac sácajacro. Ba récaji lino oya cat, oya buw bi cat, oya tic bi cat, oro cat, ac ray cat, perla ray cat ówjacro.

<sup>17</sup>Cuatán ahra cab rehti oy eyan, ray eyan bahnác bar bahnjacro. Etar cuero, wacáyqueyra.

Canó cumac bi cayibin cat, canó yehwquin cat, canó yehwquin cacmín cat, cajc istiy cuar istá rabar cue rehcáyqueyra. Bíyinat cajc istiy uw quin ran acu yacúr guitar békhequin cat cue rehcáyqueyra. <sup>18</sup>Eyin cajc istiy cuar Babilonia pueblo wahníc iyar istáyqueyra. Eyta istír conáyqueyra.

—Ey pueblo owárara istiyrá batro, wacáyqueyra.

<sup>19</sup>Eyta cona rabar erar uwa racar cue rehquít, ima cuis otar ica bur chácayqueyra. Eyta chaquir abáy óyqueyra. Eyta o rabar, wacáyqueyra:

—Babilóninu, Babilóninu, ba racar cuero. Yacúr guitar behquin, canó cumac bi cayibin, ba quin

oya raruitar, oyin, rayin cuít yinjacro. Eytacuar  
cab rehti rayan oyan bahnác in bar bahnjacro,  
wacáyqueyra.

<sup>20</sup> Eytawacayat, cuacúrabáuitarítquinan ahní  
rehcáyqueyra. Sirima uwcat ahní rehcáyqueyra.  
Jesús chihtáehcuquin cat ahní rehcáyqueyra. Sir  
chihtáehcuquin cat ahní rehcáyqueyra. Sirima  
uwaruhwújáques, Sirat Babiloniauitaritic  
eyincuécujacro. Eytachihtara Sir uwa ahní re-  
hcáyqueyra.

<sup>21</sup> Etar Sircacúm chihchirántobinat ac cumac  
bi yehwíjacro. Ac cumac bi ánaban wan bi yehwír  
yacúricar téjecro. Eytatercar wajacro:

—Ac cumac bi ter eyta Babilonia pueblocat  
éytaan wan téyqueyra. Eytaruhwúrttéyqueyra. Eytaté-  
cayat, búcoyrapuebloeyistábáreyra. <sup>22</sup>Puebloey  
icararpa cowcowtecajcbúcoyrarahcubáreyra.  
Aytaquícajccatbúcoyrarahcubáreyra. Tirá  
cuhqúicajccatbúcoyrarahcubáreyra. Rúbara  
cuhqúicajccatbúcoyrarahcubáreyra. Eytacat  
yeraóroquin cat, carucóroquin cat, acóroquin  
cat, puebloueyicarbúcoyraita báreyra. Anab  
uba cuitira tajquícajcbúcoyrarahcubáreyra.  
<sup>23</sup>Lámparaoacatpuebloeyicarbúcoyraana  
báreyra. Síbijincahbaramjor yehwójcor tevíwjajc  
catbúcoyrarahcubáreyra. Puebloeyicarráquinan  
cajca bahnácticuitar carinyehnjáquinro. Pueblo  
eycuitarítquinatcuicáyajquírcuitar, cajcistiy  
uwbahnaquin cayar yajáquinro. <sup>24</sup>Puebloeyicar  
Siruwcat, Sirchihtáehcuquin cat tiwjactehmár  
puebloeychihtácticuitarcajcbahnácticuitaruw  
tiwjactehmár puebloeycatbahnácsutáyqueyra,  
wajacro.

## 19

<sup>1</sup> Etar aját ajcyaran to rahjacro. Ricá to binat cuacúruitar cohwić ajcyár rahjacro. Ricá to binat cohwić rabar wajacro:

Sir ojcor ay tewí. Uw Síuquib Siran eyro. Caran tahnác bin Siran eyro. Ajcan cámaran cuít bin Siran eyro. <sup>2</sup> Sirat uw eyta cuécwata bin cuécuro. Chihtá istánuitar uw cuécuro. Wiwá isarib eyat isár yajquíruitar, cajcan bahnác cutar itquin quin im eyta yajquíc síwjacro. Eta jawí bahnaquin ur aujacro. Eyta yajác tehmár Sirat cuécujacro. Wiw eyat Sir uw yaujác tehmár cat cuécujacro, wajacro.

<sup>3</sup> Eyta cohwić car bucoy cohwić:

—Pueblo ey wahníc íyaran uwan cuánaan cuacúr warwar yehnáyqueyra. Eyta chihtara Sir ojcor ay tewí, wajacro.

<sup>4</sup> Eyta cohwyat owár werjayín cuisa veinticuatro binat imár cuisa bahujacro. Estají bin cuisa bacay binat cat imár cuisa bahujacro. Eynat Sira cara bancouitar itic eya ajcá ji beyin acu cuisa bahujacro. Eyta bahúr wajacro:

—Amén. Eyta jawí. Sir ojcor ay tewí, wajacro.

<sup>5</sup> Etar cara banco wihár binat cohwić:

—Sir cacminú, Sir ojcor ay tewí. Ba bíyinat ey ajcá ji becayat, ey ojcor ay tewí. Ba carin tacat, cuayin tacat, ey ojcor ay tewí: “Siran ayro,” wawí, wajacro.

### *La fiesta de las bodas del Cordero*

<sup>6</sup> Etar aját ajcyár bucoy rahjacro. Ricá to binat cohwić ajcyár rahjacro. Cohwić ráhcuitan, túcura

ajcyár éytaro. Cuir quer ajcyár eyta rahjacro. Ricá eyat cohwjacro:

—Sir ojcor ay tewí. Is Cara Sira bahnaquin cuitar rehquít, uw bahnaquin áyayqueyra. <sup>7</sup> Etya chíhtara isan ahní chácataro. Isan ey acu ay rehcátaro. “Eyan caran cuitro,” wacátaró. Ahra Obasa Jesucristo ima uw owár etiti itic cab cujacro. Sera wiya yehwír ey jor etiti itir eyta, Jesucristo cat ima uwa owár eyta itic cab cujacro. Etya cat Serat wiya yehwín cuácatayat wiy ey óriquen oror eyta Jesucristo wiquín cahmor ima uwa cat ur ay bár yajác tayar bár chácáro. <sup>8</sup> Uw eya lino oya cuasá cuasan ehchí bi owayta acu ey at icar wíjacro, wajacro.

Lino oya ehchí eyan wacayat cat oya ójcori wátiro. Sir uwat ur ay yajác ojcor wacaro.

<sup>9</sup> Etar cacúm cucuí oro soya ji bin úbisti eyat as quin wajacro:

—Uch cuihsuwi. Obasat wiya yehwíc fiesta bar yajquín yajcaro. Biyin fiesta ey cuitar ir yayín chíquictara, eyin tan wan to jácayqueyra, -wajacro-. Etya cuihsuwi. Ey chihtá Sir imát uní wajacro, wajacro.

<sup>10</sup> Etya wacayat, aját ey ques acat as cuis bahujacro. Ey tamo sehwan acu bahujacro. Etya bahwayat acat, eyat as quin wajacro:

—As acat bahuti jawí. Asra Siri batro. Asra Sir cacumró. Bahat cat, bah rábinat cat Sir ac ruór eyta, aját cat eyta ruoro. Uwat Jesús chihtá cajac éyinat ruór eyta aját cat eyta ruoro. Etya chihtara as acat bahuti jawí. Sir im tamo sehwar cat ey acat bahuwi, wajacro.

Bíyinat Jesús chihtá ehcwayat, éyinat Sir ima urá cut bow̄ cut tew̄ro.

*El jinete del caballo blanco.*

<sup>11</sup> Etar aját ítitan, cuacúr abá querat bar waajacro. Erar ítitan, caballo cuas bi itchacro. Caballo ey icaruitar uw waajacro. Caballo icar eyta waarr bic eyan ajca “Ur istán” aw̄uro. “Uní bi” aw̄uro. Ur istán eyat uw eyta cuécwata bin cuécuro. Uw owár eyta tec quejta bin uw tec quejcaro. <sup>12</sup> Aját ítitan, ey uban oca cúbaran wanro. Cuis ótaran churotán to chájacro. Ey cuitar ajc cuihsujacro. Rehr ajca cuihsujáctara, istiyát istítiro. Ey ajcan im istir binat itro. <sup>13</sup> Eyat oya enaran ques acat sohmásomro. Oy eya ab sic siwjacro. Uwat eyan “Sir ajcan chihtán” aw̄uro. <sup>14</sup> Aját ítitan, Sir cuacúr soldádoين ey questoc bécaro. Soldádoين caballo cuas bi arcutar waarr ey owár bécaro. Soldádoين lino quen bi oya cuas bi tas cuar ey questoc becaro. <sup>15</sup> Ey cac watur wihár espada ruhra ay binro. Aját itit, éytaro. Espada ey cuitar cajc istiy uw, cajc istiy uw burbar yajcátaro. Uwan yera tec cuitar áyatato. Sir chihtá cuitar uw cuécwataro. Uwat chistár ub rihar cuhmór eyta, eyat cat uwat tayar yajác ques eyta cuécwataro. <sup>16</sup> Ey oya cuitar cat, ey renar icar cat ajca uch cuihsujacro: “Reyin acu reyro. Carin acu cáraro,” cuihsujacro. Cuacúr abá querat waarr car aját eyta itchacro.

<sup>17</sup> Aját eyta istír car Sir cacúm cat itchacro. Sir cacúm ey rahs arcutar itro. Cacúm eyat bacasít cuít butach cut bahnác cuit cohwjacro. Cuacúr éctari bequic cuit cohwjacro:

—Rowí. Rowí. Ruwa buw̄ay rowí. <sup>18</sup> Carin sura, reyin sura, capitanin sura, soldádo sura, caballo sura, caballo bequin sura, patronin sura, cacmín sura, werjayín sura, cuayin sura, uw bahnaquin sura yayay rowí. Ey rowí rowí yayay rowí, wajacro.

<sup>19</sup> Etya wacayat acat, aját ricúm itchacro. Yacúr icar bin yehnjác ricúm ey itchacro. Aját ítitan, yacúr ricúm cat, cajc bahnác rey carin cat owár sécuajacro. Eycin secuar cat, soldádo to bin caquir sécuajacro. Secuar cat caballo cuasáy bi guitar bequib owár cat ey chiwa owár cat tec quejn síh̄waro. <sup>20</sup> Etya tec quejn síh̄wayat, yacúr ricúm ey caquir questajacro. Sir chihtá ehcúquinir bin cat caquir questajacro. Ehccúquinir bin eyat récaji uwat istiti bin yajáquinro. Etya yajquír guitar uw cayar yajáquinro. Biyin úbcara guitar ricúm ajca cuihsujáctara, bíyinat ricumír órojoquey ajca ji béjectara, eyin cayar yajáquinro. Ricúm ey cat ehcúquinir ey cat oca riw icar téjero. Azufre oca icar téjero. <sup>21</sup> Etya ter car caballo cuas bi guitar b-equibat ima espada guitar bahnaquin tiw̄ téjero. Bahnaquin tíwjacro. Ima cac watur wihrá espada chajac guitar tíwjacro. Etya tiwyat ectar ji binat ey sura bahnác yájaco. Yira bosayta yájaco.

## 20

### *Los mil años*

<sup>1</sup> Etar aját ítitan, Sir cacúm cuacúr abá guitar bin racaro. Ey at icar llave cat, yera chistár cat yehw̄ro. Llave ey cutar ucar únrrura cu báhnajar bi querat waátarro. <sup>2</sup> Sir cacúm ey wiquir car, ricúm cuacúr abá bin uc ayjac ey caquir questajacro.

Ricúm eya, cahmor cumoró eyro. Eya “Sisrám” cat awuro. “Satanás” cat awuro. Sir cacmát ey caquir bara mil ac yera chistár cuitar questajacro. <sup>3</sup> Etya questár ucar únrrura cu báhnajar bi icar téjecro. Etya ter car querat ey cay cujacro. Cay cur car tun téjecro. Éyat uw istiy, uw istiy, bahnaquin cayar yajti acu eyta cay tun téjecro. Bara mil cuaníc ocsotas erar tun téjecro. Etar bara mil cuanyat sicor inic bar rícuá áyayqueyra. Biráy bár cuat rícuá áyayqueyra.

<sup>4</sup> Etar aját bucoy cara banco istiy cat, istiy cat quir bi itchacro. Banco ey cuitar carin itro. Carin éyinat uw urá wahitín acu yinjáquinro. UW sácajaquin cat itchacro. Sácajaquin éyinan Jesusat yajác ojcor ehcujacro. Jesús ojcor ehcujác ques, cuisa cuijáquinro. Sir chihtá siwjac ques, cuisa cuijáquinro. Yacúr ricúm ajcá ji beti yajác ques, ey sibará órojoc ajcá ji beti yajác ques, ubcar cut, atcar cut ey ajca cuihsuti yajác ques, cuisa cuijáquinro. Eynan sácajac cuquir car sicor estají yinjacro. Etya yinír Jesucristo owár bara mil ac uw áyjacro. <sup>5</sup> Sácajaquin cahujinra anto estají yíntiro. Bara mil anto caba cuanti cuácat yíntiro. Etya éyinan sácajaquin récaram estají yinata éyinro. <sup>6</sup> Bíyinan récaram yinata eyin owár yínyatan, ohbac chácayqueyra. Sir im uw rehquít eyta yináyqueyra. Eynan cab oc icar chaca báreyra. Sirat eyin cuecwa báreyra. Yar aya báreyra. Cuatán éyinan Sir cucajá acat Jesucristo cucajá acat ay tan acu yináyqueyra. Yinír car bara mil rehcáyqueyra.

<sup>7</sup> Etar bara mil waa bahcayat Satanás sicor rícuáyqueyra. <sup>8</sup> Etya rícuayat eyat cajcan teyan

bahnácuitar uw cuw ajquírtew̄quin, uw cuw ajquírtew̄quin, uwan to cayar yajcáyqueyra. Gog uwa cat, Magog uwa cat cayar yajcáyqueyra. Cayar yajquíreyin tec quejn acu sécuayqueyra. Secuar ítitan, ricán toro. Yacúrumítéytaro.<sup>9</sup> Etya secuar tec quejn acu cajc istiy bin rocáyqueyra. Behquir car Sir uw itquin cajca cutar bahnác rúhracat tunáyqueyra. Sir imáypueblo sehnác ey rúhracat tunáyqueyra. Etya tunyat Sirat, cuacúrbin oca áyayqueyra. Eyin bahnín acu áyayqueyra. Ocat eyin bahnác sutáyqueyra.<sup>10</sup> Etar Sisrámcat, Sisrám imát cayar yajaquin cat ocan riw eyta ey icar, asufre oca icar téyqueyra. Yacúr ricúmowár, Sir chihtáehcúquinirowár rehquín acu oca riw icartéyqueyra. Oca riw icar uwan cuánaan rícara cat, chéycara cat abáryuhwáyqueyra.

### *El juicio ante el gran trono blanco*

<sup>11</sup> Etar aját cara banco cuas bi itchacro. Cara banco cuitar itic ey cat itchacro. Ey cahm ehúr rehquít, cajc cutar itquin cat, cuacúrcuitar itquin cat, ruhcuín yajquít cat biscani rúhcua jatro.<sup>12</sup> Aját sácajaquin cat itchacro. Carin sácajaquin cat, cacmín sácajaquin cat itchacro. Aját ítitan, éyinan cara banco acat ítchacro. Erar ita rabar, aját ítitan, Sirat carit wahitín acu waajacro. Uwat bitara yajáctara carit ey cuitar cuihsujáquinro. Carit istiy cat waajacro. Carit ey cuitar Sir owár etiti ítata eyin ajc cuihsujáquinro. Etar carit wahitírcuitar bíyinatan ur ay yajáctara, bíyinatan ur ay bár yajáctara itchacro. Etar ur ay bár yajác ques Sirat eyin cuécujacro. Etya yajác ques ruhwújacro.<sup>13</sup> Carit eyta waacayat, yacúr icar bin cat, wahntar

cajc cut bin cat, ruiy cajc icar bin cat sácajaquin yinjacro. Eyta yinyat sácajaquin urá wahitchacro. <sup>14</sup> Etar wahntar cajc cat, ruiyin cajc cat oca riw icar téjecro. Ey oca riw icar tey eyan bucoy yinti sutáyqueyra. <sup>15</sup> Biyin ajcan Sir owár etiti ítata carituitar cuihsútitara, éyinan oca riw icar téyqueyra.

## 21

### *Cielo nuevo y tierra nueva*

<sup>1</sup> Etar aját cuacúr abá ibsoy bi itchacro. Cajcan teyan ibsoy bi itchacro. Cuacúr abán récaram eyra bar sutchacro. Cajcan teyan récaram eyra bar sutchacro. Yacúr cat batro. <sup>2</sup> Etar aját Sir ima pueblo itchacro. Jerusalén pueblo itchacro. Cuacúruitar bin cajc uch cutar pueblo ey raquíc itchacro. Sirat ayat eyta raquíc itchacro. Aját íitan, cahbár sera jor yehwín cahmor óriquen bin oror eyta pueblo ey cat éytaan wan ay órojocro. Oror cat cajc cutar raquíc itchacro. <sup>3</sup> Etar aját ajcyaran to cohwič rahjacro. Cara bancouitar ítquinat wajacro:

—Uch rahcwí. Siran uw owár itic cab cjacro. Ahra eya uw owár ítayqueyra. Uwan Sir imáy chácayqueyra. Sirat uw owár ohbac ténayqueyra. <sup>4</sup> Ub rihar uhcayat, eyat sicor tan wan chácayqueyra. Cue cat cue bár chácayqueyra. Saca cat saca báreyra. Uw sácati etar biyin rácarí cona báreyra. Oqui cat o báreyra. Yar cat yar bár chácayqueyra. Cahmor orac bár ey bahnác waa bahjac etar yahncutra bahnacan cue bár óracro.

<sup>5</sup> Eyta wacayat cara bancouitar itic eyat wajacro:

—Aját wacaro. Aját bahnác tehmár cat bucoy bahnác orac cháquinro, -wajacro-. Chihtá ey cuihsuwi. Chihtá eya uniro. Chihtá eya tehmó báreyra, wajacro.

**6** Etar as quin wajacro:

—Ahra bar caba yajacro. Bar tihjacro. Asan récaji binan eyro. Asan ubar cat ubar ojcor eyro. Asan bahnaquin cahmor eyro. Bahnaquin ques cut ey cat eyro. Biyin cuc wini rehcayat, aját rihan wan bi wíquinro. Rihan wan bi racar wíquinro. Rihan wan ey yahcayat, asi jor yarti etiti ítayqueyra. **7** Biyat as chihtá wácati tan úctara, asi jor etiti ítayqueyra. Asan ey ácuan Sir queney cháquinro. Eya as ac wacján wan waáyqueyra. **8** Cuatán bíyinat ruhwú cáhmara as chihtá cátitara, bíyinat as chihtá waca téctara, eyin oca riw icar téyqueyra. Bíyinat tayar yajquiruitar cahujín ub cahmor urá ahsíntara, bíyinat uw yauwíctara, eyin oca riw icar téyqueyra. Bíyinat isár yájctara, bíyinat cuicá yájctara, bíyinat Sirir órojoc ajcá ji béctara, bíyinat tewyat sínictara, éyinan oca riw icar téyqueyra. Azufre oc icar téyqueyra. Ey oc riw icar técayat, bucoy waati acu sácayqueyra.

### *La nueva Jerusalén*

**9** Etar Sir cacum úbisti as quin wijacro. Wijác eya cacmín cuisa cucuí bin sicaturo. Cacmín éyinat oro soy sar ey ubar ojcor uw ruhwún ac uhcájaquinro. Uw ubar ojcor ruhwún ac uhcajaquey wiquir as quin wajacro:

—Asi jor béowi. Obasat cahbara yehwata ey wahitín acu asi jor béowi, wajacro.

<sup>10</sup> Eyta waquír asan rirar cuacuran cuít bi arcutar cuwín yehw̄ béjecro. Erar cur car, Sir ima puébloan Jerusalén itchacro. As quin ehcwayat, itchacro. Pueblo ey ítitan, cuacúr abá bin racaro. Sir owár bin racaro. <sup>11</sup> Pueblo eya Sir churot éytaro. Pueblo eya wan beo beo aca rayan wanro. Ac jáspean wanro. Pueblo ey vídrioan wanro. <sup>12</sup> Pueblo ey rúhracat querán cuacuran to chájacro. Quérata cat dócero. Querat istiy acor, istiy acor Sir cacmín istiy cat, istiy cat chájacro. Israelin sasá bómcarin ajc istiy, ajc istiy querat istiy cutar, querat istiy cutar cuihsujacro. Etya wan wan querat doce cutar cuihsujacro. <sup>13</sup> Rahsa raqui wihár querat bayro. Rahsa rauwi wihár cat querat bayro. Istiy yir wihár cat querat bayro. Rahray yir wihár cat querat bayro. <sup>14</sup> Pueblo quer ey ques icar querá cuati ac acan doce chájacro. Ey ac istiyuitar ajc istiy cuihsujacro. Ac istiyuitar ajc istiy cuihsujacro. Etya wan wan aca doceuitar cuihsujacro. Obas chihtá bequin ajca doce cuihsujacro.

<sup>15</sup> Sir cacum asi jor teŵquey at icar tec yehw̄ro. Enara bítatara wahcún ac oro tec yehw̄ro. Pueblo cat pueblo querat cat, pueblo querá cat wahcún acu yehw̄ro. <sup>16</sup> Pueblo eya enár cat yir cat owáraro. Cacum eyat pueblo ey tec cut ey wahcujacro. Wahcúr ítitan, yir cat dos mil doscientos kilómetrocuano. Enár cat dos mil doscientos kilómetrocuano. Cuacúr cat dos mil doscientos kilómetrocuano. Bahnaçan owáraro. <sup>17</sup> Querá cat wahcúr ítitan, aatá cat sesenta y cuatro metrocuano. Uwat wahcúr eyta, Sir cacmácat eyta wahcujacro. <sup>18</sup> Quer eya jaspe ac cu-

tara órojocro. Cuatán puéblora oro queney cutara órojocro. Oro cuar vídrioan wanro. <sup>19</sup> Pueblo querá quesan ac raya cutar órojocro. Ques récaram ey jaspe ac cutar órojocro. Ques bucoy ey zafiro ac cutar órojocro. Ques bawoy ey ágata ac cutar órojocro. Ques bacoy ey esmeralda ac cutar órojocro. <sup>20</sup> Ques eswoya ey ónica ac cutar órojocro. Ques teroy ey cornalina ac cutar órojocro. Ques cucwoy ey crisólito ac cutar órojocro. Ques abwoy ey berilo ac cutar órojocro. Ques estarwoy ey topacio ac cutar órojocro. Ques ucásiwoy ey crisoprasa ac cutar órojocro. Ques once eya jacinto ac cutar órojocro. Ques doce ey amatista ac cutara órojocro. <sup>21</sup> Querat doce eyan perla doce cutara órojocro. Querat istiy perla istiy, querat istiy perla istiy ajcra wan wan doce chájacro. Pueblo ibit oro quéneyro. Vídrioan wanro.

<sup>22</sup> Pueblo ey cuitar Sir tamo sihwán ac usi túwtiro. Sir ajcan to ey iman erar rehcayat, Obas iman erar rehcayat, ey tamo síhwayta acu ubach icr acui túwajatro. <sup>23</sup> Pueblo ey rahs cat táyotiro. Sihyór cat táyotiro. Sir ima churotá cuitar bahnác wan beo beo rehquíc, Obas iman wan beo beo rehquíc etar rahs cat, sihyór cat táyotiro. <sup>24</sup> Ey chihtá cuitar cajc istiy uwat, cajc istiy uwat icúr bi bahnác yajcáyqueyra. Uwa wanquir cuitar búnabo teti bir eyta, uw bahnáquinat ey chihtá cuitar éytaan wan icúr bi bahnác ohbac yajcáyqueyra. Cajcan teyan réyinat cárinat pueblo ey cuitar imár icuran biyan ay biyan oyan, rayan, churotán Obas acu rocáyqueyra. <sup>25</sup> Pueblo ey quératrá rícatra icúr acui tuná báreyra. Quehsí bin rauvic cahmar icúr acui tuná báreyra. Cheycar cat ey cuitar baquí

chaca báreyra. Wanquira chácayqueyra. <sup>26</sup> Cajc istiyuitar bin, cajc istiyuitar bin icuran, biyan, ay biyan oyan, rayan, bahnacan, pueblo eyuitar chacay rocáyqueyra. <sup>27</sup> Eytacuar icúr bi restá ji bin eyuitar chaca báreyra. Bíyinat ur ay bár yajáctara, bíyinat Sir tayar yajáctara, bíyinat tewyat sínjactara, eyuitar rauwa báreyra. Biyin Obas owár ojquir itin acu carituitar ajca cuihsujáctara, imár éyina raúwayqueyra.

## 22

<sup>1</sup> Etar cacúm eyat rih cumac bi as quin ehcu-jacro. Rih ey yahyat, Sir owár ohbac etiti ítayqueyra. Rih eya timá bár cuasayan ehchiro. Vídroian wanro. Rih ey Sir banco sícara bin racaro. Obas banco sicar bin racaro. <sup>2</sup> Pueblo ubutuitar jin bicaro. Pueblo ibit cajc awat bicaro. Rih ey cajc awat rahray wihár, rahray wihár cárcro. Caruc ey ub yácat, yarti etiti ítayqueyra. Caruc éyatan sihyór istiy jat, sihyór istiy jat ub chácaro. Eytan bar istiy icar uban icar doce chácaro. Caruc ey cahyan uw bahnaquin tan jaquin acu sec acuan ayro. <sup>3</sup> Pueblo eyuitar Sira quehsí binra ita báreyra. Cara banco esar chájacro. Banco ey Siray cat, Obasay catro. Sir ima chiwat ey pueblouitar ey ajcá ji beyáyqueyra. <sup>4</sup> Eytinat imár ub cuitar Siran uchta orac istáyqueyra. Chiwa eyin ubcar icar Sir ajc cuihswáyqueyra. <sup>5</sup> Eratra tina báreyra. Uwat rahsa cat oca wanquir cat táyotiro. Sir iman eyin ac rahsan wan wanquiran rehcáyqueyra. Eytinan carin yináyqueyra. Bur cut suw cut eyta rehcáyqueyra.

*La venida de Jesucristo está cerca*

<sup>6</sup> Etar cacúm eyat as quin wajacro:

—Aját uchta wac uchan uniro. Etya wajác eyan ohbac rahcuátaro. Cara Sirat cuacúr cacmá ima uw quin ehcú áyjacro. Sir ey ima chihtá ehcuquin ur icar ima Ajcan Cámurán Ey wíjaquinro. Sirat bira rehti bitara útara rehcátataro im uw quin ehcú áyjacro, -wajacro-. Sirat wacaro. <sup>7</sup> “As in bar cuwinro,” wajacro.

Carit uchuitar cuihsujác eya bíyinat ey chihtá wácati cáctara, Sirat eyin obir yajcáyqueyra.

<sup>8</sup> Asa Juanat eyta wajác rahjacro. Ajmár ub cuitar eyta yajác itchacro. Etya rahcuír, eyta istír, asa cuacúr cacúm acat as cuisa bahún yajacro. Cacmát as quin ehcujác rehquít, aját ey ajcá ji bequic sihwán acu as cuisa bahún yajacro. <sup>9</sup> Etya bahún yajcayat eyat as quin wajacro:

—As ácatra bahuti jaw̄i. Asra Siri batro. Asra Sir cacumró. Bahat cat, bah rábinat cat, Sir ac ruór eyta, aját cat ey acu ruoro. Carit uch chihtá ráhcuiquinat yajquír eyta, Sir chihtá ehcúquinat yajquír eyta, aját cat eyta yajcaro. Etya chihtara as ácatra bahuti jaw̄i. Sir im istir tamo sehwär eyta buhuwi, wajacro.

<sup>10</sup> Etya waquír acsar as quin wajacro:

—Carit cuitar Sir chihtá cuihsujác ey, uw quino ruhcti ehcuwi. Icúr rehcata wajác ey in bar rehcáyqueyra. Etya chihtara ruhcti ehcuwi. <sup>11</sup> Ur ay bár yájqueyinat acsar ur ay bár yajcáyqueyra. Sir tayar yájqueyinat acsar Sir tayar yajcáyqueyra. Sir ub cahmor ay yajcata bin yájquinat wácati ay yajcata bin yajw̄i. Ur ay yájquinat wácati ur ay yajw̄i. <sup>12</sup> Uch rahcwi. As cab rehti in bar cuwinro.

As tayár yajáqueyin aját cuécunro. Uw bahnáquinat bitara útara yajáctara, aját ey sehwarz car rahra túnayqueyra. <sup>13</sup> Asan récaji binan eyro. Asan ubar ojcor ey cat eyro. Asan bahnaquin cahmor im eyro. Bahnaquin ques cut im eyro. As cahmoran rehrí chátiro. As yahncút cat rehrí chátiro, wajacro.

<sup>14</sup> Biyin oya sujáctara, Sirat eyin ohbac chácayqueyra. Eyin ima jor yarti etiti itin acu, caruc ub yayín acu ajc waáqueyra. Pueblo querat icar rauwin acu ajc waáqueyra. <sup>15</sup> Pueblo querá watar bayar urán wan eyin cat, cuicá yajquín cat, isár yajquin cat, uw yauquin cat, sirir órojoc ey tamo síhwaquin cat, sucuar siquin cat, tewyat sinquin cat pueblo ey icar rau ayti síuyat, watar ítayqueyra.

<sup>16</sup> Jesusat bucoy cat wajacro:

—Asa Jesusat cuacúr bin ajmár cacmá ba quin áyjacro. As chiwa séquaquin quin chihtá uch ehcún ac áyjacro. Asan David bómcatro. Asa eyat cohná bahjacro. Asan cuanocoán wanro. Cuanocó waa-cayat bar cuan raquíe ehcúr eyta aját cat Sir ima cara yehníñ yajquíc ojcor ehcuro, wajacro.

<sup>17</sup> Sir Ajcan Cámurán Eyat cat, Obasa wiyat cat “Rawí,” wacaro. Bíyinat chihtá ráhcuyat, éyinat “Rawí,” wacátar. Biyin cuc wínitara, rowi. Biyin cuc wini rehcayat yah cun réhctara, yarti etiti ítayta acu rih yahwi. Rih ey buway rowi.

<sup>18</sup> Aját bahnaquin cucáj acat uní wacaro. Chihtá carit uchuitar cuihsujác ey ráhcuiquin quin wacaro. Bíyinatan imár chihtá carit uchuitar chácayat, Sirat éyinan cuécwayqueyra. Sirat bar

ruhwáyqueyra. Carit uch icar uw bitara ruhwata ehcúctara, eyta ruhwáyqueyra. <sup>19</sup> Etya cat carit uch cuitar chihtá cuihsujác ajc istiy cuicáyatrá, Sirat eyin ima pueblo icar rauw ayti síwayqueyra. Yarti etiti ítayta ac caruc ub yay ayti síwayqueyra. Carit uch cuitar pueblo ey ojcor, caruc ey ojcor wacaro.

<sup>20</sup> Etya wáqueyat wacaro:

—Uniro. Asa cab rehti cuwinro, wacaro.

Amén. Etya jawí. Caru Jesusu, cab rehti rawí.

<sup>21</sup> Cara Jesucristoat ima uw bahnaquin racar rehquít, ba bahnaquin obir yajwí. Amén.

**Sir chihtá  
New Testament in Tunebo, Central**

copyright © 2011 Wycliffe Bible Translators, Inc.

Language: Central Tunebo (Tunebo, Central)

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tunebo, Central

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files  
dated 29 Jan 2022  
c38c95ce-e7e4-500c-97a7-8e3bd711c176